

MESYUARAT KEDUA, PENGGAL PERTAMA
PARLIMEN KEEMPAT BELAS
2018

HARI ISNIN : 29 OKTOBER 2018

PEMBERITAHUAN PERTANYAAN BAGI JAWAB LISAN
DEWAN RAKYAT MALAYSIA

PERTANYAAN : JAWAB LISAN

DARIPADA : TUAN CHANG LIH KANG
[TANJONG MALIM]

TARIKH : 29 OKTOBER 2018

SOALAN : Tuan Chang Lih Kang [Tanjong Malim]
minta **MENTERI LUAR NEGERI**
menyatakan sama ada Kerajaan baru
Pakatan Harapan bersedia untuk
menandatangani (ratify) Konvensyen-
konvensyen Hak Asasi Manusia Persatuan
Bangsa-bangsa Bersatu (PBB) yang selain
daripada CEDAW dan CRC.

PEMBERITAHUAN PERTANYAAN BAGI JAWAB LISAN
DEWAN RAKYAT MALAYSIA

PERTANYAAN : JAWAB LISAN

**DARIPADA : DATUK SERI DR. RONALD KIANDEE
[BELURAN]**

TARIKH : 31 OKTOBER 2018

**SOALAN : Datuk Seri Dr. Ronald Kiandee
[Beluran]** minta **MENTERI LUAR
NEGERI** menyatakan apakah
perkembangan untuk menandatangani
baki enam konvensyen hak asasi manusia
seperti yang dinyatakan YB Menteri
sebelum ini iaitu antara lain ialah
Konvensyen Antarabangsa terhadap
Segala Bentuk Diskriminasi Kaum,
Perjanjian mengenai Hak Sivil dan Politik
serta Konvensyen Pertubuhan Bangsa
Bersatu Menentang Penyeksaan dan
Hukuman Lain yang Zalim, Tidak
Berperikemanusiaan dan Menjatuhkan
Maruah.

PEMBERITAHUAN PERTANYAAN BAGI JAWAB LISAN
DEWAN RAKYAT MALAYSIA

PERTANYAAN : JAWAB LISAN

**DARIPADA : TUAN NIK MOHAMAD ABDUH BIN NIK
ABDUL AZIZ
[BACHOK]**

TARIKH : 6 DISEMBER 2018

SOALAN : Tuan Nik Mohamad Abduh bin Nik Abdul Aziz [Bachok] minta MENTERI LUAR NEGERI menyatakan apakah Kerajaan telah melaksanakan kajian terperinci sebelum meneruskan langkah menandatangani enam lagi baki konvensyen antarabangsa bagi memastikan tiada klausa yang bertentangan dengan agama, budaya dan adat di negara ini.

JAWAPAN

Tuan Yang di-Pertua,

Saya mengucapkan terima kasih kepada Yang Berhormat Tanjong Malim ke atas pertanyaan yang dikemukakan.

Tuan Yang di-Pertua,

2. Izinkan saya menjawab pertanyaan Yang Berhormat Tanjong Malim bersekali dengan pertanyaan daripada **Yang Berhormat Beluran pada 31 Oktober**, dan **Yang Berhormat Bachok pada 6 Disember 2018** kerana semua soalan-soalan yang dikemukakan menyentuh isu yang sama.

3. Untuk makluman Dewan yang mulia ini, kajian mengenai penyertaan Malaysia ke instrumen-instrumen antarabangsa hak asasi manusia sedang giat dijalankan oleh Kumpulan Kerja Teknikal yang telah ditubuhkan di bawah Jawatankuasa Antara Kementerian dan Agensi mengenai Isu-Isu Hak Asasi Manusia. Bagi tujuan mengkaji ratifikasi enam (6) konvensyen hak asasi manusia antarabangsa, Kerajaan telah menubuhkan enam (6) Jawatankuasa Kecil Teknikal yang diterajui oleh Kementerian atau agensi seperti Kementerian Dalam Negeri, Kementerian Sumber Manusia, Jabatan Perpaduan Negara dan Integrasi Nasional serta Kementerian Luar Negeri mengikut bidang kuasa mereka berkaitan dengan intipati konvensyen hak asasi manusia antarabangsa.

4. Ke arah meratifikasikan konvensyen-konvensyen ini, beberapa siri Mesyuarat Antara Agensi untuk mengkaji secara terperinci kedudukan Malaysia telahpun diadakan. Langkah ini penting bagi memastikan peruntukan-peruntukan sedia ada dalam konvensyen antarabangsa tersebut adalah serasi dan tidak bercanggah dengan undang-undang domestik sedia ada.

5. Sememangnya Kerajaan telah berjanji untuk menandatangani baki enam konvensyen hak asasi manusia dan justeru itu, usaha sedang giat dijalankan oleh jawatan-jawatankuasa teknikal untuk merealisasikan sasaran kerajaan. Antaranya, Jawatankuasa Kecil Teknikal yang diterajui oleh Kementerian Dalam Negeri akan mengadakan bengkel bagi membincangkan Konvensyen mengenai Penyeksaan (*Convention against Torture and Other Cruel, Inhuman or Degrading Treatment or Punishment – CAT*) dan Konvensyen Antarabangsa Untuk Perlindungan Semua Orang Dari Kehilangan Yang Dipaksa (*International Convention for the Protection of All Persons from Enforced Disappearance – ICPED*) dalam jangka masa terdekat.

6. Seperti mana yang telah dijanjikan dalam manifesto Pakatan Harapan, pihak Kerajaan akan terus mengambil inisiatif yang proaktif untuk mengkaji ratifikasi kesemua konvensyen hak asasi manusia antarabangsa. Perbincangan berterusan secara berkala diadakan bukan sahaja dengan pelbagai agensi Kerajaan, tetapi juga dengan masyarakat madani serta badan-badan bukan Kerajaan seperti Suruhanjaya Hak Asasi Manusia Malaysia (SUHAKAM), Gabungan Badan-Badan Bukan Kerajaan Dalam Proses UPR (COMANGO), dan Gabungan Organisasi Masyarakat Sivil Dalam Proses Semakan Sejangat (MACSA).

Sekian, terima kasih.

SOALAN NO: 2

PARLIMEN MALAYSIA
PEMBERITAHU PERTANYAAN DEWAN RAKYAT

PERTANYAAN : Lisan

DARIPADA : Datuk Seri M. Saravanan [Tapah]

TARIKH : 29 Oktober 2018 (Isnin)

SOALAN : Datuk Seri M. Saravanan [Tapah]
MENTERI PERTANIAN DAN
INDUSTRI ASAS TANI menyatakan transformasi (tambah baik) yang telah dicadangkan Kementerian dalam meningkatkan pendapatan belia/golongan muda dalam bidang pertanian asas tani.

JAWAPAN

Tuan Yang Dipertua,

Transformasi di dalam bidang Agromakanan dilihat agak mencabar kerana ia memerlukan pengetahuan dan kemahiran teknikal untuk menambah baik kaedah sedia ada yang digunakan kini. Walau bagaimanapun, industri Agromakanan merupakan industri yang popular dan dapat menjana pendapatan yang tinggi terutama bagi golongan belia. Bagi meraikan transformasi di bidang pertanian dan Agromakanan, Kementerian telah merangka berbagai program dilaksanakan oleh Jabatan dan Agensi dibawah MOA yang telah memberi kesan positif seperti berikut:

i. **Program Agropreneur Muda.**

Program ini khusus kepada belia berumur 18 hingga 40 tahun sebagai galakan dalam bidang keusahawanan pertanian dan memberi sokongan untuk usahawan agropreneur muda untuk meningkatkan produktiviti mereka melalui bantuan barangan dan khidmat perkhidmatan.

ii. **Program Latihan Kemahiran Pertanian (PLKPL).** Program ini menawarkan

pertanian kepada semua generasi muda yang

berkelayakan bagi peringkat Sijil dan Diploma Kemahiran (Pertanian) di 15 buah Pusat Bertauliah seluruh Negara dalam pelbagai bidang seperti petanian, veterinar dan perikanan;

iii. **Program MyAgrosis (dibawah FAMA)**

Objektif program ini adalah bagi melahirkan kelompok usahawan siswazah tani di kalangan institusi tinggi awam dan swasta.

Satu program baru yang dinamakan *New Breed Marketing Entrepreneur* (NBME) telah diperkenalkan oleh FAMA sebagai program transformasi dalam meningkatkan pendapatan belia atau golongan muda dalam bidang pertanian dan industri asas tani. Program NBME ini adalah kerjasama di antara FAMA (portal AgroBazaar Online), Institut Pengajian Tinggi Awam (IPTA) bersama ahli Kelab MYAGROSIS khasnya dan pelajar amnya serta usahawan industri asas tani (IAT).

Selain itu, salah satu pendekatan yang telah dilaksanakan oleh Jabatan Pertanian pula adalah melatih golongan belia dengan memberi kursus kemahiran jangka masa panjang (6 bulan) dan jangka masa pendek (3 hari) berkaitan pemprosesan makanan berasaskan pertanian.

SOALAN NO: 2

Melalui program tersebut, golongan belia telah diberi latihan dalam bidang pengurusan projek, pemprosesan makanan, keusahawanan dan pemasaran. Di samping itu, khidmat nasihat teknikal juga disediakan oleh Jabatan dan Agensi dalam bidang agronomi tanaman, pengurusan tanah, kawalan perosak dan penyakit dengan mengamalkan Amalan Pertanian Baik bagi meningkatkan pengeluaran tanaman makanan negara secara tidak langsung dapat meningkatkan pengeluaran dan pendapatan usahawan secara optimum.

Selain daripada itu, Kementerian ini juga telah memperkenalkan penggunaan teknologi digital sebagai langkah untuk memodenkan sektor pertanian dengan menggalakkan penggunaan aplikasi mudah alih menggunakan peralatan seperti telefon pintar, iPad dan lain-lain yang dibangunkan oleh MARDI, Jabatan Pertanian, Jabatan Perikanan dan FAMA.

**PEMBERITAHUAN PERTANYAAN DEWAN RAKYAT
MESYUARAT KEDUA, PENGGAL PERTAMA,
PARLIMEN KEEMPAT BELAS**

PERTANYAAN : LISAN

DARIPADA : TUAN SIVAKUMAR VARATHARAJU NAIDU
[BATU GAJAH]

TARIKH : 29 OKTOBER 2018 (ISNIN)

SOALAN NO. 3

Minta **MENTERI BELIA DAN SUKAN** menyatakan prestasi atau pencapaian SUKMA yang telah berlangsung baru-baru ini di negeri Perak. Apakah harapan Malaysia dalam Sukan Olimpik 2020 dan persediaan-persediaan yang dilakukan untuk menghadapi temasya itu di Tokyo.

JAWAPAN

Yang di-Pertua,

1. Saya mohon untuk menjawab soalan daripada **YB Batu Gajah** bersekali dengan soalan daripada **YB Bagan Serai** dan **YB Machang** bertarikh 21 November, **YB Rembau** bertarikh 4 Disember dan **YB Ledang** pada 10 Disember 2018 kerana ia berkaitan dengan perkara yang sama iaitu berkenaan Kejohanan Sukan Malaysia (SUKMA) dan Persiapan menghadapi Sukan Olimpik Tokyo 2020.
2. Untuk makluman Ahli Yang Berhormat, penganjuran Temasya Sukan Malaysia (SUKMA) sudah masuk edisi ke 19 sejak mula diadakan pada tahun 1986 di Kuala Lumpur. Melalui penganjuran SUKMA ini, negeri-negeri telah melaksanakan pelbagai program latihan bagi menyediakan atlet-atlet muda bersaing di temasya tersebut. SUKMA juga sudah sinonim dengan pembangunan sukan negara dan menjadi medan persaingan atlet-atlet muda negara untuk mempamerkan prestasi terbaik mereka bagi membolehkan mereka terpilih di peringkat lebih tinggi dan seterusnya mewakili negara.
3. SUKMA Perak 2018 yang telah diadakan pada 11 sehingga 22 September 2018 lalu disertai oleh seramai 6,517 orang atlet daripada 15 kontinjen negeri. Daripada jumlah ini, seramai 1,381 orang atlet adalah daripada program Majlis Sukan Negara khususnya program Kita Juara, Pelapis Kebangsaan, Pelapis Serantau dan Pelapis Negeri dan mereka turut membantu menyumbangkan pungutan pingat emas kepada pencapaian keseluruhan kontinjen negeri.
4. Sebanyak **6 rekod kebangsaan** telah dipecahkan dalam sukan **renang (1)** dan **angkat berat (5)** manakala sebanyak **60 rekod SUKMA** telah diperbaharui melalui **angkat berat (27)**, **renang (6)**,

memanah (10), menembak (10) dan olahraga (7) berbanding dengan temasya SUKMA tahun 2016 di mana 7 rekod kebangsaan dan 55 rekod kejohanan telah diperbaharui.

5. Untuk makluman Ahli Yang Berhormat, beberapa cadangan penambahbaikan dari aspek penganjuran SUKMA akan dilaksanakan pada edisi akan datang terutamanya melalui pengurangan kos pembangunan fizikal seperti keperluan pembinaan baru serta kerja-kerja naik taraf venue pertandingan. Kaedah ini juga secara tidak langsung dapat mengawal perbelanjaan penganjuran SUKMA dengan lebih baik dan efisien.
6. Pembangunan prasarana sukan di bawah SUKMA akan seterusnya dapat digunakan oleh pihak kerajaan negeri melalui Majlis Sukan Negeri-Negeri dalam melaksanakan program pembangunan sukan prestasi tinggi dengan lebih terancang dan berkesan untuk jangka masa panjang.
7. Proses persediaan penganjuran juga akan ditambah baik dari segi aspek penganjuran serta pertandingan khususnya penambahbaikan kepakaran pegawai teknikal bagi setiap sukan yang dipertandingkan. Dengan persediaan yang lebih rapi, diharapkan penganjuran SUKMA akan datang setanding dengan penganjuran temasya sukan antarabangsa.
8. Bagi persediaan ke temasya Sukan Olimpik Tokyo 2020, Kementerian melalui Institut Sukan Negara telah melaksanakan program Podium sejak tahun 2016 dengan misi memburu pingat emas pertama negara dalam Sukan Olimpik. Oleh yang demikian, tanggapan bahawa program Podium ini gagal mencapai sasaran adalah kurang tepat kerana sasarannya adalah pada Sukan Olimpik Tokyo 2020 nanti. Walau bagaimanapun, Program Podium ini sedang

disusun semula berdasarkan prestasi dan pencapaian di Temasya Sukan Komanwel Gold Coast 2018 dan Sukan Asia Jakarta 2018. Satu 'post mortem' telah dilaksanakan oleh MSN dan ISN pada 13 dan 14 September yang lalu.

9. Program ini akan diteruskan dengan penggunaan dana yang lebih berfokus dan tumpuan adalah kepada persediaan bagi menghadapi saingan ke Sukan Olimpik 2020. Pihak Kementerian akan mengambil langkah penambahbaikan dengan memfokuskan kepada sukan-sukan berpotensi tinggi seperti sukan badminton, karate, terjun dan berbasikal. Penumpuan terperinci terhadap latihan dan pertandingan antarabangsa, perkhidmatan sains dan perubatan sukan spesifik, kejurulatihan dan teknologi sukan yang merupakan aspek tumpuan menjelang persiapan ke Sukan Olimpik Tokyo 2020.
10. Untuk makluman Ahli Yang Berhormat juga, sehingga kini, terdapat seramai 13 jurulatih asing di bawah program Podium dalam sukan boling padang, terjun, berbasikal, skuasy, badminton, gimnastik berirama, olahraga dan angkat berat. Jumlah jurulatih ini dijangka akan berkurangan bergantung kepada '*selection*' atlet-atlet yang memenuhi kriteria pemilihan yang telah ditetapkan (*tier 1* yang terdiri dari atlet-atlet yang berpotensi memenangi pingat di Sukan Olimpik 2020 dan *tier 2* yang terdiri daripada atlet-atlet yang berpotensi akan memenangi pingat di Sukan Asia/Komanwel 2022). Proses pemilihan ini akan memastikan bahawa jumlah atlet seharusnya berkurangan daripada jumlah terkini iaitu 148 atlet.

SOALAN NO : 3

11. Sukan yang berpotensi memenangi pingat di Sukan Olimpik seperti yang dimaklumkan tadi akan diberi keutamaan untuk berlatih dan bertanding di luar negara. Salah satu pendekatan pengurangan kos latihan di luar negara adalah melalui faedah daripada perjanjian persefahaman (MoU) yang telah ditandatangani di antara ISN dan *Japanese Olympic Commiitee, Oita Prefecture* dan *Nakatsu City*. Ini merupakan platform terbaik pendedahan latihan di Jepun melalui kos yang minima.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL PERTAMA
PARLIMEN KEEMPAT BELAS**

PERTANYAAN : LISAN

**DARIPADA : DATO' SERI MAHDZIR BIN KHALID
[PADANG TERAP]**

TARIKH : 29 OKTOBER 2018 (ISNIN)

SOALAN NO.4

Minta **MENTERI PENDIDIKAN** menyatakan perkembangan terkini kajian holistik yang telah dibuat berkaitan dengan Sijil Peperiksaan Bersepadu (UEC) dan apakah perkara utama yang dipertimbangkan di dalam kajian terbabit.

JAWAPAN

Yang di-Pertua,

Terdapat dua pertanyaan lagi yang berhubung kait dengan pengiktirafan Sijil Peperiksaan Bersepadu (UEC). Oleh itu, izinkan saya menjawab pertanyaan pada hari ini serentak dengan pertanyaan daripada:

- (i) YB Bintulu pada 12 November 2018; dan**
- (ii) YB Puncak Borneo pada 27 November 2018.**

Seperti yang pernah dijelaskan dalam sesi persidangan yang lepas, pengiktirafan *Unified Examination Certificate* (UEC) perlu diselesaikan secara holistik (menyeluruh) dan tidak terburu-buru tanpa menjejaskan kedudukan dua tonggak utama yang pertamanya pemartabatan atau kedudukan Bahasa Melayu, keduanya isu perpaduan dan keharmonian antara kaum di negara ini. Kita tidak mahu isu ini dijadikan isu politik, dan isu perkauman seperti yang pernah dilakukan oleh beberapa pihak yang tidak bertanggungjawab. Oleh yang demikian kita juga cuba memastikan sebarang keputusan yang dibuat adalah berdasarkan keputusan yang rasional, jauh daripada emosional dengan mengambil kira dua tonggak utama tadi dan juga mengetepikan sebarang usaha untuk mempolitikan isu tersebut.

Maka, kajian holistik berhubung isu pengiktirafan UEC ini mempunyai dua komponen iaitu kajian dalaman yang dilakukan oleh pihak kementerian sendiri dan proses pengumpulan maklumat dan input dari pelbagai sumber yang dibuat oleh satu Pasukan Petugas Dasar *Unified Examination Certificate* (PPDUEC) berkaitan dasar UEC yang dianggotai oleh tokoh-tokoh masyarakat dalam kalangan individu yang terlibat dengan UEC dan juga mereka yang berada di luar sistem tersebut. Pasukan ini diketuai oleh Dr. Eddin Khoo, anak kepada Prof. Khoo Kay Kim dan akan dibantu oleh Saudara Mohamad Raimi Abdul Rahim, Presiden ABIM dan keduanya Saudara Tan Yew Sing iaitu Timbalan Presiden Dong Zhong.

No. Soalan: 4

Pasukan ini penting bagi mengumpul pandangan atau makluman melalui libat urus dengan pemegang taruh berhubung isu UEC. Proses libat urus akan membawa semua pihak yang pro, pihak yang kritikal dan pihak yang neutral tentang UEC. Ini perlu dilakukan kerana kerajaan terdahulu tidak langsung melakukan usaha libat urus, hanya membiarkan isu ini dalam keadaan dipolitikkan. Sama ada mereka pro di satu sudut atau mereka anti di sudut yang lain. Tidak ada usaha serius daripada kerajaan terdahulu.

Kerajaan Pakatan Harapan sebagai kerajaan yang bertanggung jawab akan memulakan usaha yang substantif untuk isu UEC. Pandangan dan makluman ini penting kerana pengumpulan fakta perlu dibuat secara rasional dan tidak prejudis. Sebarang keputusan berkenaan pengiktirafan UEC bukan sahaja mesti dibuat berdasarkan kajian yang menyeluruh bahkan didahului dengan perbincangan yang sihat di ruang awam berdasarkan fakta-fakta yang dikumpulkan secara objektif, rasional, bebas dan lengkap oleh Jawatankuasa ini. Hal ini penting agar tidak ada mana-mana pihak tidak bertanggungjawab boleh mengambil kesempatan untuk mempolitikkan isu pendidikan dan masa depan anak-anak bangsa dengan maklumat tidak tepat dan rekaan.

Kita dapati banyak salah sangka oleh banyak pihak terhadap isu UEC ini, sama ada bagi mereka pro terhadap UEC atau bagi mereka yang kritikal terhadap UEC. Maka kita dapati ianya timbul kerana tiada proses libat urus daripada semua pihak untuk membincangkan isu ini secara telus, terbuka dan rasional tanpa emosional. Maka sebagai kerajaan yang bertanggungjawab sekali lagi saya mengatakan kita meletakkan proses konsultasi dengan semua pihak agar keputusan yang dibuat nanti adalah berteraskan *bottom up* bukannya *top down* seperti banyak yang dilakukan oleh kerajaan BN sebelum ini.

Fakta-fakta yang dikumpulkan oleh Jawatankuasa ini akan bakal digunakan. Jawatankuasa ini akan membantu pihak Kementerian untuk menyediakan laporan yang akan dibawa kepada Kabinet untuk membuat keputusan yang terbaik berhubung isu pengiktirafan UEC. Hal ini demikian kerana isu pengiktirafan UEC ini bukan sekadar isu peperiksaan

semata-mata bahkan melibatkan isu perundangan, integrasi nasional dan lebih penting lagi masa depan anak-anak bangsa.

Fokus Kerajaan Pakatan Harapan kini adalah untuk menyediakan sekolah kebangsaan sebagai sekolah pilihan. Pelbagai usaha dilakukan untuk meningkatkan kualiti pendidikan tanpa membebankan guru dan akan memberi peluang kepada semua murid pelbagai kaum untuk berjaya di bumi Malaysia ini. Sehubungan dengan itu, KPM amat mengharapkan agar semua pihak berkepentingan yang terlibat dalam proses pengumpulan maklumat dan *input* dapat berbincang dan mengemukakan pandangan dan cadangan secara matang dan terbuka dalam menyelesaikan isu pengiktirafan UEC.

Sekian, terima kasih.

RJM48

NO. SOALAN : 5

PEMBERITAHUAN PERTANYAAN BAGI JAWAPAN LISAN
MESYUARAT KEDUA, PENGGAL PERTAMA,
PARLIMEN KEEMPAT BELAS,
MAJLIS MESYUARAT DEWAN RAKYAT

PERTANYAAN : LISAN

**DARIPADA : YB TUAN OSCAR LING CHAI YEW
[SIBU]**

TARIKH : 29 OKTOBER 2018
MENJAWAB

SOALAN : 5

YB TUAN OSCAR LING CHAI YEW [SIBU] minta **PERDANA MENTERI** menyatakan apakah perkembangan terkini tentang kajian menyemak semula Perjanjian Malaysia 1963 (MA63) oleh Jawatakuasa Khas Kabinet.

JAWAPAN: YB DATUK LIEW VUI KEONG

MENTERI DI JABATAN PERDANA MENTERI

Tuan Yang di-Pertua,

1. Pertanyaan yang dikemukakan oleh YB Sibu dijawab bersekali dengan soalan-soalan yang berikut:

- (i) soalan nombor 39 oleh YB Kota Marudu untuk dijawab pada 30 Oktober 2018;
- (ii) soalan nombor 47 oleh YB Batang Sadong untuk dijawab pada 1 November 2018;
- (iii) soalan nombor 19 oleh YB Kinabatangan untuk dijawab pada 12 November 2018;
- (iv) soalan nombor 22 oleh YB Kota Kinabalu untuk dijawab pada 12 November 2018;
- (v) soalan nombor 7 oleh YB Julau untuk dijawab pada 14 November 2018;
- (vi) soalan nombor 36 oleh YB Petrajaya untuk dijawab pada 15 November 2018;

- (vii) soalan nombor 41 perenggan (a) oleh YB Puncak Borneo untuk dijawab pada 21 November 2018;
 - (viii) soalan nombor 1 oleh YB Sungai Petani untuk dijawab pada 26 November 2018;
 - (ix) soalan nombor 24 oleh YB Beaufort untuk dijawab pada 29 November 2018;
 - (x) soalan nombor 31 oleh YB Kota Marudu untuk dijawab pada 29 November 2018;
 - (xi) soalan nombor 25 oleh YB Kapit untuk dijawab pada 3 Disember 2018;
 - (xii) soalan nombor 37 oleh YB Batang Lupa untuk dijawab pada 3 Disember 2018;
 - (xiii) soalan nombor 38 oleh YB Beluran untuk dijawab pada 11 Disember 2018;
2. Seperti YB sedia maklum, pada Hari Malaysia 16 September 2018, YAB Perdana Menteri Malaysia, Tun Dr. Mahathir Mohamad telah mengumumkan bahawa Sabah dan Sarawak adalah rakan kongsi sama rata dengan Persekutuan Tanah Melayu seperti yang termaktub dalam Malaysia Agreement 1963.

3. Susulan daripada itu, pada 10 Oktober 2018, Jemaah Menteri telah meluluskan Jawatankuasa Khas Kabinet yang dipengerusikan oleh YAB Tun Dr. Mahathir Mohamad, Perdana Menteri bersama Ketua Menteri Sabah YAB Datuk Seri Haji Mohd Shafie bin Haji Apdal dan Ketua Menteri Sarawak YAB Datuk Patinggi Dr. Abang Hj Abdul Rahman Zohari bin Tun Datuk Abang Haji Openg. Saya juga akan berada dalam jawatankuasa tersebut bersama YB Tuan Lim Guan Eng, YB Dato' Seri Mohamed Azmin Ali, YB Tuan Gobind Singh Deo, YB Dato' Saifuddin Abdullah, YB Tuan Baru Bian, YB Tuan Darell Leiking, YB Tuan Anthony Loke Siew Fook, Ketua Setiausaha Negara YBhg. Datuk Seri Dr. Ismail bin Bakar, Hakim Besar Sabah dan Sarawak YAA Datuk David Wong Dak Wah, Peguam Negara YBrs. Tuan Tommy Thomas, Peguam Besar Sarawak, YBhg. Datuk Talat Mahmood Abdul Rashid dan Peguam Besar Sabah Puan Hajah Zaleha Rose Pandin.
4. Jemaah Menteri juga telah bersetuju dengan penubuhan Jawatankuasa Teknikal yang dipengerusikan bersama oleh saya dan Peguam Negara serta Jawatankuasa Kerja.
5. Selain dari itu, satu *Task Force* yang diurusetikan oleh Bahagian Hal Ehwal Undang-Undang yang akan disertai oleh pegawai-pegawai dari pelbagai agensi Kerajaan akan dijalankan untuk jangka masa 6 bulan.
6. Bahagian Hal-Ehwal Undang-Undang telah mengadakan dua (2) mesyuarat bersama pihak berkepentingan termasuk wakil-wakil dari Sabah dan Sarawak serta agensi-agensi kerajaan seperti

Jabatan Peguam Negara, Unit Perancang Ekonomi, Kementerian Kewangan dan Jabatan Perkhidmatan Awam berkenaan senarai isu-isu yang telah dikenal pasti sebelum ini. Memandangkan mesyuarat pertama Jawatankuasa Khas Kabinet (Jawatankuasa Pemandu) akan diadakan dalam masa yang terdekat, satu Mesyuarat *pre-council* akan diadakan pada 1 November 2018 sebagai persediaan menghadapi Mesyuarat Jawatankuasa Khas Kabinet tersebut.

7. Selain dari itu, Bahagian Hal Ehwal Undang-Undang juga telah mengadakan perjumpaan dengan Jabatan Perkhidmatan Awam berkenaan penempatan pegawai-pegawai dalam *Task Force* yang telah dipersetujui oleh Jemaah Menteri. Penempatan pegawai-pegawai ini dijangka akan dilaksanakan dalam masa yang terdekat memandangkan Jawatankuasa Khas Kabinet diberi hanya 6 bulan untuk melaksanakan penyemakan kepada Perjanjian Malaysia 1963.

PEMBERITAHUAN PERTANYAAN BAGI JAWAPAN SOALAN LISAN
MESYUARAT KEDUA, PENGGAL PERTAMA,
PARLIMEN KEEMPAT BELAS
MAJLIS MESYUARAT DEWAN RAKYAT
15 OKTOBER HINGGA 11 DISEMBER 2018

PERTANYAAN : LISAN

DARIPADA : DATO' SRI DR. HAJI ISMAIL BIN MOHAMED SAID
[KUALA KRAU]

TARIKH : 29 OKTOBER 2018

SOALAN :

minta **MENTERI INDUSTRI UTAMA** menyatakan apakah usaha untuk membantu para peneroka dan pekebun kecil meningkatkan pendapatan mereka melalui industri sawit dan getah. Adakah sebarang bantuan Kerajaan bagi memberi nilai tambah kepada mereka.

JAWAPAN:

Tuan Yang di-Pertua,

Kerajaan amat prihatin dan sentiasa membantu mengukuhkan pendapatan peneroka dan pekebun kecil sawit dan getah. Antara usaha yang dilaksanakan untuk pekebun kecil sawit adalah seperti berikut:

- (i) memberi bantuan melalui Skim Tanam Semula dan Tanam Baharu Sawit untuk Pekebun Kecil sebanyak RM7,500 sehektar bagi Semenanjung Malaysia dan RM9,000 sehektar di Sabah dan Sarawak untuk pembersihan tapak, bekalan benih, input pertanian dan khidmat nasihat;
- (ii) memberi diskaun sehingga 20 peratus melalui Skim Insentif Mekanisasi Ladang Sawit (OPIMIS) kepada pengusaha ladang bagi setiap pembelian jentera untuk digunakan di ladang sawit. Penggunaan jentera akan dapat meningkatkan produktiviti dan mengurangkan penggunaan tenaga buruh bagi mengatasi masalah kekurangan tenaga kerja yang dihadapi oleh sektor perladangan sawit ketika ini; dan
- (iii) melaksanakan program integrasi tanaman dan integrasi ternakan dengan sawit bagi memaksimumkan penggunaan tanah supaya pekebun kecil sawit persendirian dapat menjana pendapatan tambahan ketika sawit di peringkat pra-matang. Di bawah program ini kerajaan memberi insentif antara RM3,000 hingga RM11,000 sehektar untuk integrasi tanaman dan penyediaan induk ternakan seperti lembu dan kambing.

Tuan Yang di-Pertua,

Bagi pekebun kecil getah pula, usaha yang dijalankan oleh Kerajaan adalah seperti yang berikut:

- (i) melaksanakan Insentif Pengeluaran Getah (IPG). Insentif ini akan diaktifkan apabila harga purata bulanan getah menurun di bawah Paras Harga Pengaktifan (PHP) iaitu RM5.50 sekilogram atau purata bulanan harga ladang *cuplump* di paras RM2.20 sekilogram. Sebarang kekurangan harga daripada paras PHP akan ditampung oleh Kerajaan. Kadar ini membolehkan pekebun kecil dengan produktiviti getah sekerap 3,000 kilogram/hektar/tahun dan purata milikan tanah 2 hektar, mencapai pendapatan bulanan sebanyak RM1,100; dan
- (ii) melaksanakan mekanisme penetapan harga di ladang. Program ini menyediakan peruntukan sebanyak RM6.4 juta sebagai modal pusingan kepada koperasi-koperasi untuk tujuan urus niaga getah. Langkah ini dapat meningkatkan harga pembelian getah di peringkat ladang dengan mengurangkan lapisan pembeli. Pengurangan orang tengah membantu pekebun-pekebun kecil getah mendapat harga yang munasabah dan '*remunerative*';

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL PERTAMA,
PARLIMEN KEEMPAT BELAS**

PERTANYAAN : LISAN

**DARIPADA : TUAN HASANUDDIN MOHD YUNUS
[HULU LANGAT]**

TARIKH : 29 OKTOBER 2018 (ISNIN)

SOALAN NO. 7

Minta **MENTERI PENGANGKUTAN** menyatakan apakah langkah terbaik untuk memastikan syarikat penerbangan tidak menaikkan harga ketika musim perayaan.

JAWAPAN

Yang di-Pertua,

1. Untuk makluman Yang Berhormat, untuk memastikan syarikat penerbangan tidak menaikkan harga ketika musim perayaan, YB Menteri Pengangkutan telah mengadakan satu mesyuarat dengan syarikat-syarikat penerbangan pada 4 September 2018 berhubung isu tersebut dan telah memutuskan langkah-langkah seperti berikut:
 - (i) sebagai langkah interim, Kerajaan tidak akan menetapkan harga siling dan harga lantai bagi tambang tiket penerbangan domestik bagi tujuan mengelakkan sebarang manipulasi oleh syarikat-syarikat penerbangan yang mana purata harga tiket akan menjadi lebih tinggi walaupun di luar musim perayaan sekiranya ia dilaksanakan;
 - (ii) Kerajaan akan terus membenarkan harga tiket ditentukan oleh pasaran semasa (*market driven*) yang mana syarikat-syarikat penerbangan negara akan menetapkan kadar tambang penerbangannya dengan mengambil kira permintaan pasaran, keadaan ekonomi serta faktor-faktor lain seperti harga bahan api dan kos operasi;
 - (iii) Bagi mengurangkan kenaikan harga tambang sempena musim perayaan, Kerajaan telah mendapatkan komitmen daripada syarikat-syarikat penerbangan negara untuk meningkatkan kapasiti penerbangan melebihi 20 peratus bagi tempoh 7 hari sebelum musim perayaan Hari Raya Aidilfitri, Tahun Baru Cina, Hari Gawai dan Pesta Keamatan khususnya di laluan-laluan yang mempunyai permintaan yang tinggi;
 - (iv) Dalam hubungan ini, Kementerian akan turut mendapatkan kerjasama daripada operator lapangan terbang, syarikat pengendalian darat, perkhidmatan ERL dan teksi untuk

NO. SOALAN: 7

melanjutkan operasi di lapangan terbang yang berkaitan dalam tempoh 7 hari tersebut;

- (v) Orang ramai disaran untuk membuat perancangan dengan membeli tiket penerbangan lebih awal bagi mendapatkan tawaran harga tiket yang lebih murah berbanding pembelian disaat akhir; dan
- (vi) Pihak Pihak Suruhanjaya Penerbangan Malaysia (MAVCOM) telah diminta untuk membuat pemantauan berhubung pengenaan kadar tambang yang dikenakan oleh syarikat penerbangan dan meneliti impak pelaksanaan kaedah interim ini. Sekiranya, kaedah ini tidak berjaya untuk menyelesaikan masalah kenaikan harga tambang yang tidak munasabah sempena musim perayaan, pihak Kementerian akan mempertimbangkan semula cadangan untuk menetapkan harga siling dan harga lantai bagi tambang tiket penerbangan domestik.

Sekian, terima kasih.

**DEWAN RAKYAT
PEMBERITAHUAN PERTANYAAN
MESYUARAT KEDUA, PENGGAL PERTAMA
PARLIMEN KEEMPAT BELAS (2018)**

PERTANYAAN : LISAN

**DARIPADA : TUAN AHMAD TARMIZI BIN SULAIMAN
[SIK]**

TARIKH : 29 OKTOBER 2018 (ISNIN)

SOALAN :

Tuan Ahmad Tarmizi bin Sulaiman [Sik] minta **PERDANA MENTERI** menyatakan usaha yang telah dilakukan bagi penambahbaikan kedudukan mahkamah syariah dan penyeragaman undang-undang Syariah di seluruh negeri Malaysia.

**JAWAPAN: (YB DATUK SERI DR. MUJAHID BIN YUSOF,
MENTERI DI JABATAN PERDANA MENTERI)**

Tuan Yang di-Pertua,

Saya mohon untuk menjawab soalan ini bersekali dengan soalan lisan yang dibangkitkan oleh Ahli Yang Berhormat Kota Bharu bertarikh 5 Disember 2018 kerana menyentuh isu yang sama. Untuk makluman Ahli Yang Berhormat, kerajaan sentiasa memberi perhatian kepada usaha-usaha untuk menambahbaik kedudukan Mahkamah Syariah dari aspek tadbir urus dan prasarana. Antara usaha-usaha yang sedang dilakukan adalah seperti berikut:-

1. Menaiktaraf sistem E-Syariah kepada sistem E-Syariah versi 3 untuk penambahbaikan pengurusan pendaftaran kes-kes di Mahkamah

Syariah di seluruh Malaysia dan meningkatkan lagi kecekapan penyampaian melalui transformasi sistem E-Syariah;

2. Meningkatkan prasarana Mahkamah Syariah melalui pembangunan Kompleks Mahkamah Syariah baharu. Projek pembangunan Mahkamah Syariah baharu yang sedang dalam proses pembinaan ialah di negeri Sabah dan negeri Pahang;

3. Meningkatkan tahap kecekapan pengurusan Mahkamah Syariah dan mempercepatkan penyelesaian kes di Mahkamah Syariah. Pendekatan ini telah dilakukan melalui beberapa program inovasi di Mahkamah Syariah negeri-negeri antaranya seperti berikut :

- a) Projek **Key Focus Activity (KFA)** bagi proses *Sulh* yang dilaksanakan oleh Mahkamah Syariah Wilayah Persekutuan berkenaan dengan tempoh masa bagi pengeluaran perintah bersih bagi kes-kes yang diselesaikan melalui proses Sulh telah dapat dipendekkan **dari tempoh 14 hari ke tempoh satu (1) jam** bermula dari pengendorsan perjanjian penyelesaian di hadapan Hakim sehingga perintah bersih dikeluarkan.

Selain itu, Mahkamah Syariah Wilayah Persekutuan turut memperkenalkan Kaunter **Do It Yourself (DIY)** yang diwujudkan bagi mempertingkatkan mutu perkhidmatan kepada pelanggan mengenai penyediaan pliding di Mahkamah Syariah. Dengan adanya kemudahan sedemikian, ia dapat memberikan pilihan kepada pelanggan untuk menyediakan sendiri pliding mereka dan dapat mengurangkan kos penyediaan pliding tersebut.

- b) Projek proses Kerja Kes Cerai **Fast Track** yang dilaksanakan oleh Jabatan Kehakiman Syariah Negeri Selangor. Projek ini dilaksanakan bagi mempercepatkan penyelesaian kes perceraian di bawah seksyen 47 Enakmen Undang-Undang Keluarga Islam (Negeri Selangor) 2003

(EUKIS) daripada sembilan puluh (90) hari ke enam (6) jam waktu bekerja.

Disamping itu, satu lagi inovasi yang telah berjaya dihasilkan oleh Jabatan Kehakiman Syariah Negeri Selangor ialah **Mobile Court Kit** yang merupakan satu set kelengkapan bagi perbicaraan luar dewan bicara yang mengandungi set peralatan yang lengkap untuk kegunaan perbicaraan yang mengandungi meja dan kerusi Hakim, Pembantu Syariah dan Setiausaha Hakim, ruang penyimpanan fail, laptop dan alat tulis serta mengandungi ruang penyambungan wayar elektrik dan peralatan audio.

- c) Sistem **Mysolve** yang dilaksanakan oleh Jabatan Kehakiman Syariah Negeri Perak. Sistem tersebut merupakan Pendaftaran *Online* bagi kes perceraian Seksyen 47 dan Pengesahan Lafaz Cerai Seksyen 57 di bawah Enakmen Keluarga Islam (Perak) 2004. Setelah pendaftaran tersebut dilakukan, pihak mahkamah dalam tempoh tiga (3) hari akan menetapkan tarikh pendengaran kes tersebut di hadapan Hakim untuk diselesaikan pada hari yang sama.
- d) Sistem **E-SIAP (E-Shariah Instant Access Procedure)** yang dilaksanakan oleh Jabatan Kehakiman Syariah Negeri Pulau Pinang bagi mempercepatkan penyelesaian kes-kes persetujuan bersama dalam tempoh satu (1) hari, iaitu bermula dari proses penyediaan pliding sehingga pengeluaran perintah Mahkamah.
- e) Sistem **MyReCourt** yang dilaksanakan oleh Jabatan Kehakiman Syariah Negeri Kedah. Sistem tersebut yang baru dilancarkan pada 1 Ogos 2018 dibangunkan sebagai salah satu alternatif proses penyediaan dokumen pendaftaran kes bagi Jabatan Kehakiman Syariah Negeri Kedah. Ia bertujuan untuk membantu para pelanggan yang hadir ke mahkamah Syariah semasa membuat pendaftaran kes.

4. Meningkatkan program latihan, kompetensi dan peluang melanjutkan pengajian bagi melahirkan Pegawai Syariah yang berkompentensi tinggi, mempunyai kemahiran pelbagai (*multi skill*) dan mampu meningkatkan lagi sistem penyampaian kepada masyarakat. Program terkini yang sedang diusahakan oleh Jabatan Kehakiman Syariah Malaysia (JKSM) antaranya ialah mewujudkan kerjasama strategik bersama Universiti Sains Islam Malaysia (USIM) dan Universiti Tun Hussien Onn Malaysia (UTHM) melalui Memorandum Persefahaman yang telah ditandatangani pada 23 Oktober 2018 baru-baru ini. Perjanjian persefahaman tersebut merupakan program yang melibatkan skop latihan, kajian dan penyelidikan dalam bidang perundangan serta kerjasama melibatkan kemudahan bagi menyambung pengajian di peringkat Sarjana dan Ijazah Kedoktoran.

5. Menetapkan sebanyak 85 peratus penyelesaian kes-kes rayuan Syariah dalam tempoh 6 bulan selepas didaftarkan di Jabatan Kehakiman Syariah Malaysia (JKSM) sebagai petunjuk prestasi utama (KPI) bagi tahun 2018. KPI ini disasarkan kepada negeri-negeri yang menggunakan khidmat panel Hakim Rayuan Syariah daripada Jabatan Kehakiman Syariah Malaysia (JKSM). Hal ini dapat meningkatkan lagi penyelesaian kes-kes rayuan di Mahkamah Syariah dan meningkatkan tahap kepuasan pelanggan terhadap perkhidmatan pengurusan kes rayuan Syariah.

6. Pengambilan Pegawai Syariah yang mempunyai kompetensi yang terbaik (*best talent*) untuk berkhidmat di Jabatan Kehakiman Syariah Malaysia dan Mahkamah Syariah. Dalam hal ini, Jabatan Kehakiman Syariah Malaysia sentiasa mengadakan mesyuarat dan perbincangan dengan Suruhanjaya Perkhidmatan Awam Malaysia (SPA) bagi penetapan kelayakan dan tapisan calon temuduga berdasarkan kompetensi yang diperlukan dan sesuai bagi jawatan Pegawai Syariah.

7. Cadangan penubuhan Mahkamah Tinggi Syariah Bahagian Hadhanah & Nafkah dan Mahkamah Rendah Syariah Bahagian Nafkah di Wilayah Persekutuan. Cadangan ini dikemukakan oleh Mahkamah Syariah Wilayah Persekutuan bagi memberi tumpuan khusus kepada

kes-kes hadhanah dan nafkah di Wilayah Persekutuan supaya kes-kes tersebut dapat diselesaikan dengan segera dan efektif.

8. Mengkaji dan membina kaedah-kaedah baharu bagi mempertingkatkan kecekapan pengurusan pentadbiran Mahkamah Syariah. Kaedah-kaedah yang telah dihasilkan antaranya ialah Kaedah Sulh, Kaedah Fi dan Kos, dan Kaedah Hakam.

9. Mewujudkan garis panduan atau Prosedur Operasi Standard (SOP) berhubung dengan penyelarasan sesuatu proses pengendalian kes di Mahkamah Syariah. Garis panduan atau Prosedur Operasi Standard (SOP) yang telah dihasilkan antaranya adalah Buku Panduan Proses Nikah Cerai dan Ruju' di Jabatan Agama Islam Wilayah Persekutuan dan Mahkamah Syariah, Prosedur Operasi Standard (SOP) Permohonan Perintah Pengesahan dan Pendaftaran Perkahwinan (Permohonan 4P) dan Prosedur Operasi Standard (SOP) Permohonan Perkahwinan Bawah Umur di Mahkamah Syariah.

Untuk makluman Ahli Yang Berhormat, kerajaan juga memberi perhatian kepada penyelarasan dan penyeragaman undang-undang Islam di seluruh Malaysia. Usaha-usaha yang sedang dilakukan antaranya adalah seperti berikut:-

1. Kajian keperluan untuk meminda beberapa undang-undang Syariah yang sedang digunapakai di negeri-negeri bagi memastikan peruntukan undang-undang sedia ada masih relevan dengan suasana semasa tanpa mengenenepikan kehendak Hukum Syarak dan prinsip-prinsip keadilan.

2. Kajian pindaan dan penyeragaman undang-undang yang berkaitan dengan kesalahan jenayah Syariah. Ini kerana, undang-undang ini masih belum diselaraskan di antara negeri mempunyai peruntukan yang berbeza mengenai jenis kesalahan, jenis hukuman dan kadar hukuman. Ketidakeragaman ini boleh membawa kepada ketidakadilan terhadap tertuduh dan pihak-pihak yang berkenaan.

3. Kajian tentang penghukuman di bawah undang-undang jenayah Syariah supaya kaedah hukuman lebih bersifat memulih (*rehabilitative*) di samping menghukum (*retributive*), seperti perintah khidmat masyarakat. Pindaan yang akan dibuat boleh membawa rahmat kepada semua pihak tanpa menjejaskan prinsip keadilan.

4. Menggubal undang-undang yang berkaitan dengan profesion guaman Syarie untuk diguna pakai di Wilayah-Wilayah Persekutuan dan dijadikan sebagai model undang-undang yang akan diguna pakai oleh negeri-negeri.

Dalam melaksanakan proses penyeragaman undang-undang tersebut, Kerajaan melalui Jawatankuasa Teknikal Undang-Undang Syarak dan Sivil yang diurusetiaikan oleh pihak JAKIM akan membuat rundingan dan perbincangan dengan negeri-negeri melalui forum-forum seperti Majlis Dialog Undang-Undang dan Persidangan Penyelarasan Undang-Undang Syarak dan Sivil. Selain daripada itu, undang-undang yang dicadang untuk diseragam akan dibentangkan dalam Mesyuarat Majlis Kebangsaan Bagi Hal Ehwal Agama Islam (MKI) dan seterusnya diangkat kepada Majlis Raja-Raja untuk mendapatkan persetujuan dan perkenan.

Usaha-usaha penyeragaman yang dijalankan ini memerlukan kerjasama yang padu daripada negeri-negeri. Dalam hal ini, Kerajaan Persekutuan menyeru agar negeri-negeri turut memainkan peranan dalam memastikan penyeragaman undang-undang Syariah dapat dilaksanakan bagi manfaat dan keadilan umat Islam.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL PERTAMA
PARLIMEN KEEMPAT BELAS**

PERTANYAAN : LISAN

**DARIPADA : TUAN MUSLIMIN BIN YAHAYA
[SUNGAI BESAR] (PH-PPBM)**

TARIKH : 29 OKTOBER 2018 (ISNIN)

SOALAN NO.9

Minta **MENTERI PENDIDIKAN** menyatakan apakah status sebenar pemegang Diploma Vokasional Malaysia dari segi penarafan agensi yang setara dengan diploma IPTA dan IPTS serta peluang mereka ke IPTA.

JAWAPAN

Tuan Yang di-Pertua,

Untuk makluman Ahli Yang Berhormat, Semua program Diploma Vokasional Malaysia (DVM) oleh Kolej Vokasional (KV) perlu melalui prosedur penilaian akreditasi semasa. Semenjak Jun 2016 sehingga kini, Agensi Kelayakan Malaysia (*Malaysian Qualifications Agency*, MQA) telah menerima sebanyak 615 program untuk penilaian akreditasi.

Daripada jumlah tersebut, 510 program (83%) telah mendapat akreditasi sementara. Untuk penilaian akreditasi penuh, sebanyak 428 program telah diterima untuk penilaian akreditasi. 12 program DVM oleh KV telah mendapat Akreditasi Penuh. Manakala 54 program dalam proses memenuhi syarat-syarat untuk akreditasi penuh. Sebanyak 362 program pula sedang menjalani proses penilaian dan perlu mematuhi syarat-syarat bagi mendapat akreditasi penuh yang dijangka selesai pada pertengahan tahun 2019.

Lulusan DVM boleh menyambung pengajian ke program ijazah sarjana muda di institusi pendidikan tinggi awam (IPTA) atau institusi pendidikan tinggi swasta (IPTS) tertakluk kepada kelulusan Senat IPTA atau IPTS dan mengambil kira penyetaraan Sijil Vokasional Malaysia dengan 3 kredit Sijil Pelajaran Malaysia seperti yang ditetapkan oleh Lembaga Peperiksaan Malaysia.

Pada masa ini, KPM sedang membangunkan program bersama-sama dengan *Malaysian Technical University Network* (MTUN) untuk memperkasakan laluan TVET terutamanya untuk pelajar lulusan DVM.

Melalui;

- (i) Pelan Artikulasi MTUN menyediakan 3 kaedah artikulasi yang ditawarkan dalam memastikan lepasan graduan TVET dapat meneruskan pengajian ke tahap 6, 7 dan 8. Kaedah tersebut adalah seperti berikut:

NO. SOALAN: 9

- i. Menyediakan laluan khas (*bridging*) graduan TVET lepasan DVM/Diploma Kemahiran Malaysia untuk program selain bidang teknologi;
 - ii. Kemasukan terus melalui program khusus Teknologi; dan
 - iii. Kemasukan melalui *Accreditation Prior Experiential Learning*.
- (ii) Sistem Akreditasi Tunggal telah dibangunkan oleh MQA bersama Jabatan Pembangunan Kemahiran (JPK) untuk:
- i. Kesetaraan antara Akreditasi MQA dan Sijil Kemahiran Malaysia (SKM);
 - ii. Pembangunan parameter setanding termasuklah terminologi; dan
 - iii. Memastikan kerjasama antara pihak MQA dan JPK dari aspek penilaian prestasi dan audit.
- (iii) 95 Program Sarjana Muda Teknologi akan ditawarkan menjelang tahun 2021.

RJM50

**MESYUARAT KEDUA, PENGGAL PERTAMA,
PARLIMEN KEEMPAT BELAS
PEMBERITAHUAN PERTANYAAN
DEWAN RAKYAT MALAYSIA**

PERTANYAAN : JAWAB LISAN

**DARIPADA : TUAN AHMAD JOHNIE BIN
ZAWAWI (IGAN)**

TARIKH : 29 OKTOBER 2018 (ISNIN)

SOALAN : 10

minta **MENTERI PEMBANGUNAN LUAR BANDAR** menyatakan apakah sistem baharu yang dikatakan akan digunakan di dalam penyaluran air bersih di kawasan pendalaman Negeri Sarawak yang belum mendapat bekalan air bersih. Nyatakan kawasan-kawasan yang terlibat dengan pelaksanaan sistem berkenaan dan bila ianya akan dilaksanakan.

JAWAPAN :

Tuan Yang Di-Pertua,

Untuk makluman Yang Berhormat, semua projek Bekalan Air Luar Bandar (BALB) Kementerian ini adalah berdasarkan permohonan daripada Kerajaan Negeri Sarawak melalui Unit Perancang Ekonomi Negeri Sarawak (SPU) dan Jabatan Bekalan Air Luar Bandar (JBALB). Projek yang diluluskan akan melalui fasa reka bentuk konsep dan melibatkan persetujuan bersama daripada pihak SPU, JBALB, KPLB dan perunding yang dilantik.

Untuk makluman Yang Berhormat juga, pelaksanaan projek-projek BALB adalah berdasarkan objektif untuk menyalurkan bekalan air bersih dan terawat kepada penduduk di luar bandar dan memenuhi skop serta garis panduan yang telah ditetapkan oleh Kementerian ini. Buat masa kini sistem yang digunakan di dalam pelaksanaan projek BALB adalah sistem retikulasi atau sistem alternatif yang mana mengikut kesesuaian tempat. Tiada sistem khusus yang baharu dicadang untuk digunakan bagi pelaksanaan mana-mana projek BALB di Sarawak.

PEMBERITAHUAN PERTANYAAN BAGI JAWAPAN LISAN
MESYUARAT KEDUA PENGGAL PERTAMA,
PARLIMEN KEEMPAT BELAS,
MAJLIS MESYUARAT DEWAN RAKYAT

PERTANYAAN : LISAN

DARIPADA : YB TUAN CHAN FOONG HIN

TARIKH : 29 OKTOBER 2018

SOALAN :

Tuan Chan Foong Hin [Kota Kinabalu] minta **MENTERI TENAGA MANUSIA** menyatakan dasar Kerajaan baharu dalam isu tenaga buruh asing, termasuk berapa kutipan levi, had kuota mengikut sektor industri.

PR-1412-L02194

JAWAPAN

Tuan Yang Di Pertua,

1. Pada masa ini, Kerajaan masih mengekalkan dasar sedia ada berhubung aspek kadar levi dan had kuota pekerja asing mengikut sektor seperti berikut:

Kadar Levi:

- (i) Sektor perkilangan, pembinaan dan perkhidmatan - RM1,850
- (ii) Sektor pertanian dan perladangan – RM640

Had Kuota Pekerja Asing

- (i) **Sektor perkilangan**
 - (a) bagi syarikat dalam sub sektor elektrik dan elektronik, nisbah kelayakan yang ditetapkan adalah 2 pekerja warganegara bagi 1 pekerja asing;
 - (b) bagi syarikat berorientasikan eksport, nisbah kelayakan yang ditetapkan adalah 1 pekerja tempatan bagi 3 pekerja asing; dan
 - (c) bagi syarikat bukan berorientasikan eksport, nisbah kelayakan yang ditetapkan adalah 1 pekerja tempatan bagi 1 pekerja asing.

- (ii) **Sektor pembinaan**
Keperluan pekerja mengikut nilai projek dan tempoh projek.
- (iii) **Sektor perkhidmatan** adalah berlandaskan kepada bilangan kerusi untuk subsektor restoran, nilai kontrak bagi sub sektor pencucian dan pembersihan, jumlah bilik/chalet bagi pusat peranginan dan sebagainya.
- (iv) **Sektor pertanian** adalah berlandaskan kepada jenis tanaman, akuakultur dan ternakan.
- (v) **Sektor perladangan** adalah berlandaskan jenis tanaman seperti kepala sawit (8 hektar: 1 pekerja), koko (4 hektar: 1 pekerja) dan sebagainya.
- (vi) **Sektor perlombongan dan kuari** adalah berlandaskan kepada *ratio* 2 pekerja tempatan dan 1 pekerja asing.

2. Kerajaan pada masa ini sedang mengkaji secara holistik berkenaan pengurusan pekerja asing di Malaysia melalui penubuhan Jawatankuasa Bebas Pekerja Asing. Pada masa ini, Jawatankuasa tersebut sedang mengadakan sesi *Town Hall* bersama pihak-pihak berkepentingan untuk mengumpul input supaya satu hala tuju baharu boleh dibentuk dan dicadangkan kepada Jemaah Menteri berhubung penambahbaikan dasar pekerja asing.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL PERTAMA
PARLIMEN KEEMPAT BELAS**

PERTANYAAN : LISAN

DARIPADA : DATO' HAJI SALIM SHARIF [JEMPOL]

TARIKH : 29 OKTOBER 2018 (ISNIN)

SOALAN NO.12

Minta **MENTERI PENDIDIKAN** menyatakan faktor kekurangan guru subjek Bahasa Inggeris di sekolah luar bandar sehingga mewujudkan jurang tahap literasi antara pelajar di kawasan bandar dan di luar bandar serta apakah usaha yang telah dilakukan oleh Kementerian untuk mengatasi masalah tersebut.

JAWAPAN

Yang di-Pertua,

Berdasarkan data Kementerian Pendidikan Malaysia (KPM) pada 2 Oktober 2018, sekolah-sekolah di luar bandar mengalami kekurangan guru mata pelajaran Bahasa Inggeris seramai 2,036, dan 656 di sekolah menengah. Antara faktor yang menyebabkan berlakunya kekurangan guru Bahasa Inggeris adalah bilangan guru bersara wajib dan bersara pilihan meningkat, perubahan dalam kurikulum dan pertambahan jumlah minit mata pelajaran Bahasa Inggeris di sekolah rendah dan sekolah menengah.

Sehubungan dengan itu, Suruhanjaya Perkhidmatan Pelajaran (SPP) sedang melaksanakan temu duga bagi pelantikan Pegawai Perkhidmatan Pendidikan Gred DG41 mulai 29 Oktober 2018 dalam kalangan graduan pendidikan universiti awam opsyen Bahasa Inggeris bagi mengisi kekosongan jawatan yang kritikal di sekolah menengah. Selain daripada itu graduan lepasan Institut Pendidikan Guru Malaysia (IPGM) opsyen Bahasa Inggeris *tagging* sekolah rendah akan ditemu duga oleh SPP juga mulai 29 Oktober 2018 bagi penempatan pada awal sesi persekolahan tahun 2019. Urusan temu duga ini melibatkan 168 graduan IPGM opsyen Bahasa Inggeris Sekolah Rendah dan sejumlah 64 calon graduan Pendidikan Universiti Awam bagi Sekolah Menengah.

Selain daripada itu, KPM juga melaksanakan inisiatif yang memberi fokus kepada keberhasilan murid dan kualiti guru dalam bahasa Inggeris. Antara program tersebut adalah seperti berikut:

1. ***Highly Immersive Programme (HIP)*** diperkenalkan oleh KPM dengan tujuan membangunkan persekitaran imersif bahasa Inggeris di sekolah bagi memupuk budaya pembelajaran serta penggunaan bahasa Inggeris yang positif dalam kalangan murid.
2. ***Program Professional Up-skilling of English Language Teachers (Pro-ELT)*** yang memberi latihan kepada guru dari bandar dan luar bandar untuk meningkatkan tahap penguasaan bahasa

Inggeris mereka supaya dapat mencapai tahap minimum CEFR C1. Dari tahun 2013 hingga 2018, terdapat seramai 17,479 guru Bahasa Inggeris telah menerima latihan Pro-ELT.

3. **Program Peningkatan Kemahiran Bahasa Inggeris di Sekolah (PPKBIS)** yang merupakan inisiatif yang memberi tumpuan kepada usaha untuk meningkatkan keberhasilan murid melalui pelaksanaan intervensi bahasa Inggeris. Sasaran bagi program ini ialah sekolah “hotspot” iaitu sekolah yang mencapai di bawah 77 peratus lulus dalam Bahasa Inggeris SPM. Sekolah hotspot PPKBIS merangkumi sekolah menengah di kawasan bandar dan luar bandar.
4. Pelibatan guru pesara Bahasa Inggeris dalam melaksanakan ***Highly Immersive Programme (HIP)*** sebagai tanggungjawab sosial secara sukarela untuk mewujudkan persekitaran imersif bahasa Inggeris di sekolah.
5. Sebagai usaha tambahan bagi meningkatkan penguasaan kemahiran Bahasa Inggeris dalam kalangan murid, KPM akan melibatkan pihak swasta seperti *Cambridge English (CE)*, *Financial Industry Collective Outreach (FINCO)*, *Teach for Malaysia (TFM)*, *English Teaching Assistants (ETA)* yang berkolaborasi dengan Kedutaan Amerika dan Yayasan PINTAR.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL PERTAMA
PARLIMEN KEEMPAT BELAS**

PERTANYAAN : LISAN

**DARIPADA : DR. KELVIN YII LEE WUEN
[BANDAR KUCHING]**

TARIKH : 29 OKTOBER 2018 (ISNIN)

SOALAN NO.13

Minta **MENTERI PENDIDIKAN** menyatakan apakah status pembaikan semua sekolah-sekolah daif di Sarawak dan berapakah peruntukan yang telah disalurkan untuk pembaikan tersebut. Apakah status siasatan terhadap JEPAK HOLDING SDN. BHD. yang sepatutnya menyediakan PV solar sistem bagi 369 sekolah pedalaman di Sarawak.

JAWAPAN

Yang di-Pertua,

Untuk makluman Ahli Yang Berhormat, sebanyak 166 projek pembangunan sekolah daif yang dilaksanakan di Sarawak dari tahun 2016 hingga 2018 dimana terdapat peningkatan jumlah projek pembaikan sekolah daif setiap tahun menggunakan kaedah *Industrialised Building System* (IBS). Daripada jumlah tersebut, 116 projek telah siap dan 50 projek dalam pelaksanaan. Pada tahun 2016, 20 projek pembangunan semula sekolah daif dilaksanakan di Sarawak dan telah siap kesemuanya. Manakala bagi tahun 2017 pula, 30 projek pembangunan semula sekolah daif dilaksanakan di Sarawak. Sebanyak 29 projek telah siap dan satu (1) projek masih dalam pelaksanaan. Seterusnya pada tahun 2018, sebanyak 116 projek daif dilaksanakan di Sarawak. 67 projek daripadanya telah siap manakala baki 49 projek lagi sedang dalam pelaksanaan. Jumlah peruntukan yang diluluskan untuk pelaksanaan projek pembangunan semula sekolah daif secara IBS di Sarawak bagi tahun 2016 hingga 2018 ialah RM617.43 juta.

Kementerian Pendidikan Malaysia (KPM) juga menyalurkan peruntukan penyelenggaraan, baik pulih dan naik taraf sekolah dan institusi pendidikan kerajaan di Sarawak. Pada tahun 2016 sebanyak RM7.6 juta telah disalurkan. Manakala pada tahun 2017 sebanyak RM9.6 juta telah disalurkan. Pada tahun 2018, KPM telah menyalurkan sebanyak RM18.05 juta bagi kerja-kerja tersebut.

Berhubung dengan isu syarikat Jepak Holding Sdn. Bhd., Kementerian ingin menjelaskan bahawa isu berkaitan kontrak pembinaan sistem *solar photovoltaic hibrid* serta pengoperasian dan penyelenggaraan genset masih dalam proses siasatan pihak Suruhanjaya Pencegahan Rasuah Malaysia (SPRM). Kementerian telah memberikan kerjasama penuh kepada pihak SPRM dalam membantu siasatan yang dilakukan ke atas syarikat tersebut.

PEMBERITAHU PERTANYAAN DEWAN RAKYAT

PERTANYAAN : LISAN

**DARIPADA : DATO' SRI ABDUL AZEEZ BIN ABDUL RAHIM
[BALING]**

TARIKH : 29 OKTOBER 2018 (ISNIN)

SOALAN NO.14

Minta **MENTERI PENDIDIKAN** menyatakan adakah Kerajaan bercadang meneruskan hasrat mengambil sukarelawan dan guru-guru pencen menjadi pembantu guru untuk keberkesanan sistem pendidikan negara.

JAWAPAN

Tuan Yang di-Pertua,

Kementerian Pendidikan Malaysia (KPM) menerusi Inisiatif Peluasan Pelaksanaan Pelibatan Ibu bapa dan Komuniti dalam ekosistem sekolah (PIBK) Pelan Pembangunan Pendidikan Malaysia (PPPM) 2013-2025 amat mengalu-alukan pelibatan ibu bapa dan komuniti termasuklah guru-guru yang telah bersara untuk dijadikan sebagai rakan strategik dalam membantu pihak sekolah.

Sehubungan dengan itu, KPM telah mengeluarkan surat makluman kepada semua Jabatan Pendidikan Negeri (JPN) bertarikh 15 Mac 2018 bagi memaklumkan Surat Pekeliling Ikhtisas (SPI) Bil 1/2018 Garis Panduan Pelibatan Ibu Bapa/ Penjaga dan Komuniti sebagai Sukarelawan Di Dalam Kelas (SdK) memberi panduan kepada sekolah tentang pelaksanaan pelibatan ibu bapa / penjaga dan komuniti membantu guru semasa proses pengajaran dan pembelajaran. Konsep Sukarelawan di Dalam Kelas melibatkan pengintegrasian sumbangan dari segi kepakaran bidang masing-masing namun masih tertakluk kepada etika profesionalisme keguruan semasa proses pengajaran dan pembelajaran.

Sukarelawan di Dalam Kelas berperanan sebagai fasalitor semasa sesi pengajaran dan pembelajaran, menyediakan bahan bantu belajar, berkongsi kemahiran dan maklumat untuk memperkayakan pembelajaran dalam kelas serta membantu guru dalam pengurusan kelas.

RJM55

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL PERTAMA,
PARLIMEN KEEMPAT BELAS**

PERTANYAAN : LISAN
DARIPADA : Y.B. TUAN HASSAN BIN ABDUL KARIM
[PASIR GUDANG]
TARIKH : 29 OKTOBER 2018 (ISNIN)

SOALAN NO. 15

Y.B. TUAN HASSAN BIN ABDUL KARIM [PASIR GUDANG] minta **MENTERI KEWANGAN** menyatakan sejauh manakah Kerajaan Pakatan Harapan berpegang kepada manifestonya untuk membawa reformasi di dalam urusan GLC supaya badan- badan GLC seperti Khazanah Nasional bebas dari diterajui oleh ahli-ahli politik.

JAWAPAN

Tuan Yang Dipertua,

Sepertimana manifesto Kerajaan Pakatan Harapan di bawah Teras 2 iaitu Mereformasi Institusi Pentadbiran Dan Politik, Kerajaan baharu tidak meneruskan amalan Kerajaan terdahulu di mana Ahli Lembaga Pengarah bagi Syarikat-syarikat Berkaitan Kerajaan (GLC) dilantik dikalangan ahli politik atau amalan kronisme.

PEMBERITAHUAN PERTANYAAN MESYUARAT KEDUA,
PENGGAL PERTAMA, PARLIMEN KEEMPAT BELAS,
MAJLIS MESYUARAT DEWAN RAKYAT

PERTANYAAN : LISAN

DARIPADA : DATO' HENRY SUM AGONG
(LAWAS)

TARIKH : 29 OKT 2018
(ISNIN)

SOALAN:

Minta **MENTERI PERTAHANAN** menyatakan sama ada program /
Projek Jiwa Murni diteruskan dan apakah status jalan Jiwa Murni dari
Ba'kelalan ke Bario dan bila projek tersebut akan disiapkan.

JAWAPAN:

Tuan Yang di-Pertua,

Kementerian Pertahanan masih lagi meneruskan pelaksanaan projek-projek pembangunan infrastruktur di bawah Projek Jiwa Murni yang telah diberikan kelulusan oleh agensi pusat bagi negeri Sarawak. Bagi projek pembinaan Jalan Jiwa Murni dari Bakelalan ke Bario Fasa 2, kemajuan projek ini pada 30 September 2018 telah mencapai 93.5% siap. Projek tersebut dijangka dapat disiapkan sepenuhnya pada suku tahun pertama 2019.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL PERTAMA
PARLIMEN KEEMPAT BELAS**

PERTANYAAN : LISAN

DARIPADA : TUAN CHA KEE CHIN [RASAH]

TARIKH : 29 OKTOBER 2018 (ISNIN)

SOALAN NO.17

Minta **MENTERI PENDIDIKAN** menyatakan berapakah jumlah peruntukan tahunan untuk SJKC dan SJKT bagi tahun 2018, dan berapakah jumlah yang masih belum diserahkan kepada sekolah-sekolah.

JAWAPAN

Tuan Yang di-Pertua,

Untuk makluman Ahli Yang Berhormat, Kementerian Kewangan telah meluluskan peruntukan Tabung Penyelenggaraan tahun 2018 kepada sekolah jenis kebangsaan Cina (SJKC) dan sekolah jenis kebangsaan Tamil (SJKT) di bawah kategori sekolah bantuan kerajaan (SBK) sebanyak RM100 juta iaitu masing-masing sebanyak RM50 juta. Peruntukan tersebut dalam tindakan penyelarasan untuk disalurkan daripada Kementerian Kewangan dan diagihkan oleh Kementerian Pendidikan Malaysia kepada sekolah-sekolah yang berkenaan.

Pada tahun 2018 juga, KPM telah menyalurkan peruntukan penyelenggaraan dan baik pulih berjumlah RM624,207.00 bagi 64 buah SJKC dan RM249,688.00 bagi 23 buah SJKT berstatus sekolah kerajaan di seluruh Malaysia.

Bagi sekolah SJKC dan SJKT bertaraf SBK, KPM juga menyalurkan peruntukan pembayaran bil utiliti sebanyak RM5000.00 sebulan (berdasarkan bil sebenar dan tidak melebihi RM5,000 sebulan) mulai tahun 2015.

RJM49

PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL PERTAMA
DEWAN RAKYAT YANG KEEMPAT BELAS

PERTANYAAN : LISAN
DARIPADA : YB. TUAN ARTHUR JOSEPH KURUP
[PENSIANGAN]
TARIKH : 29 OKTOBER 2018 (ISNIN)

SOALAN NO.18

Minta Menteri Pembangunan Usahawan nyatakan apakah perancangan khusus pihak Kementerian bagi membantu meningkatkan jumlah usahawan belia terutamanya belia luar bandar dan pedalaman Sabah Sarawak.

JAWAPAN:

Tuan Yang Di-Pertua,

Kerajaan komited untuk meningkatkan jumlah usahawan belia di seluruh negara termasuklah belia luar bandar dan pedalaman Sabah dan Sarawak. Untuk makluman Ahli Yang Berhormat, bagi membuktikan komitmen Kerajaan ini, Kementerian saya telah mengadakan Konvensyen Memperkasakan Usahawan Bumiputera di Kuching, Sarawak pada 6 September 2018 dan konvensyen yang sama juga telah diadakan di Kota Kinabalu, Sabah pada 17 September 2018. Konvensyen ini masing-masingnya telah disertai oleh kira-kira 700 dan 400 orang peserta yang mana sebahagian besarnya adalah daripada golongan belia.

Pelbagai input, pandangan serta idea daripada para peserta yang keseluruhannya terdiri daripada rakyat Sabah dan Sarawak sendiri, telah dikumpulkan melalui penganjuran kedua-dua konvensyen ini. Maklumat ini akan digunakan oleh pihak Kementerian untuk merangka dasar dan program yang lebih baik, yang boleh membantu usahawan belia di Sabah dan Sarawak secara berterusan.

Pada masa yang sama, agensi-agensi di bawah Kementerian saya juga aktif melaksanakan siri jelajah dan ekspo bergerak di kawasan luar bandar dan pedalaman Sabah dan Sarawak untuk memberikan khidmat nasihat berkenaan keusahawanan di samping mempromosikan program-program bantuan dan skim pembiayaan dari semasa ke semasa.

Tuan Yang Di-Pertua,

Tidak hanya setakat itu, Kementerian Pembangunan Usahawan juga menjalinkan kerjasama pintar dengan Kementerian Belia dan Sukan, dan telah berjaya mengadakan sesi Dialog Pembudayaan dan Pemerkasaan Usahawan Anak Muda dan Bengkel Teknikal, ataupun *Technical Working Group*, dengan izin, pada 25 September 2018. Program ini telah berjaya menarik lebih daripada 600 orang usahawan muda daripada pelbagai segmen dan kelompok industri perusahaan dan perniagaan dari seluruh negara.

Hasil daripada siri program-program Konvensyen, Dialog dan Bengkel yang telah diadakan ini, Kementerian Pembangunan Usahawan telah berjaya mengenal pasti beberapa program atau inisiatif baharu yang akan dilaksanakan pada masa akan datang, dalam usaha untuk meningkatkan lebih ramai belia luar bandar termasuklah pedalaman Sabah dan Sarawak dalam bidang keusahawanan. Selain daripada itu, Kementerian juga sedang merangka penambahbaikkkan bagi program dan inisiatif sedia ada seperti:

1. Program Teman TEKUN 2.0;
2. Program Tunas Usahawan Belia Bumiputera (TUBE); dan
3. Skim Pembiayaan Ekonomi Desa-i

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL PERTAMA,
PARLIMEN KEEMPAT BELAS**

PERTANYAAN : LISAN

**DARIPADA : YB TUAN KESAVAN A/L
SUBRAMANIAM
[SUNGAI SIPUT]**

TARIKH : 29 OKTOBER 2018 (ISNIN)

SOALAN NO. 19

Minta **MENTERI PEMBANGUNAN USAHAWAN** menyatakan apakah jenis skim atau program yang ada pada masa ini dan akan diteruskan oleh Kerajaan baru bagi membantu usahawan Malaysia.

JAWAPAN

Tuan Yang Di-Pertua,

Kementerian Pembangunan Usahawan (MED) bertanggungjawab untuk menyelaraskan pembangunan semua usahawan dalam pelbagai sektor serta merangkumi semua komposisi penduduk. Kerajaan juga komited untuk terus membangunkan usahawan agar dapat bersaing di pasaran tempatan dan antarabangsa.

Terdapat 151 program pembangunan keusahawanan dan PKS dilaksanakan oleh Kementerian dan agensi melibatkan jumlah dana sebanyak RM12.89 bilion yang memberi manfaat kepada 613,576 PKS sepanjang tahun 2018. Skim atau program yang ditawarkan adalah meliputi pembiayaan, pembangunan modal insan, pembangunan usahawan, inovasi serta infrastruktur yang membantu usahawan dalam meningkatkan daya saing perniagaan.

Antara skim dan program tersebut adalah seperti berikut :

1. Program Tunas Usahawan Belia Bumiputera (TUBE)

- Program TUBE bertujuan bagi menggalakkan generasi muda menceburi bidang perniagaan. Melalui program ini, belia yang berminat dalam menjalankan perniagaan akan dipersiapkan dengan latihan berbentuk fizikal dan didedahkan dengan maklumat asas berkenaan perniagaan.

2. Program Peningkatan Enterpris Bumiputera (BEEP)

- Program BEEP bertujuan untuk meningkatkan daya saing PKS Bumiputera menerusi bantuan bersepadu yang meliputi pensijilan,

pembungkusan, premis sewaan untuk usahawan belia, khidmat nasihat, latihan dan sokongan kewangan. Program ini dilaksanakan oleh SME Corp. Malaysia dengan kerjasama Kerajaan Negeri.

3. Program Galakan Eksport Bumiputera (GEB)

- Bagi membantu PKS yang berpotensi untuk memasarkan barangan / perkhidmatan ke peringkat antarabangsa, bantuan geran bersamaan dan skim pinjaman mudah disediakan untuk membantu meningkatkan keupayaan eksport syarikat PKS Bumiputera serta menambah bilangan PKS Bumiputera yang mampu untuk menembusi pasaran global.

Tuan Yang Di-Pertua,

Kementerian komited untuk meneruskan inisiatif serta program yang berjaya untuk meningkatkan dan membangunkan usahawan. Bagi tujuan tersebut, Kementerian sedang meneliti dan bersedia menambah baik pelaksanaan program serta inisiatif sedia ada bagi mengelakkan pertindihan pembiayaan serta pembaziran belanjawan supaya bantuan Kerajaan yang disalurkan kepada usahawan mencapai matlamatnya.

Sekian, terima kasih.

**PEMBERITAHUAN PERTANYAAN
MESYUARAT KEDUA, PENGGAL PERTAMA
DEWAN RAKYAT YANG KEEMPAT BELAS**

PERTANYAAN : LISAN
DARIPADA : YB. TUAN ABDUL LATIFF BIN ABDUL RAHMAN [KUALA KRAI]
TARIKH : 29 OKTOBER 2018 (ISNIN)

SOALAN NO. 20

Minta Menteri Pembangunan Usahawan menyatakan apakah Kementerian bercadang membantu menaik taraf infrastruktur pengusaha leman di kawasan Manik Urai yang mana terdapat sekitar 50 pengusaha leman di kawasan tersebut.

JAWAPAN

Tuan Yang Di-Pertua,

Kementerian ini komited untuk membantu usahawan secara inklusif dan bersasar terutamanya usahawan di luar bandar. Justeru, Kementerian ini akan meneliti keperluan cadangan menaik taraf infrastruktur pengusaha leman di kawasan Manik Urai bersama agensi-agensi yang berkaitan.

Untuk makluman, Kementerian Pembangunan Usahawan melalui agensi seperti TEKUN Nasional dan SME Corp. telah menyediakan

SOALAN NO.20

program-program seperti berikut bagi membantu usahawan luar bandar dalam mengukuhkan dan meluaskan pasaran perniagaan:

i. *SME Mentoring Programme*

Program ini bertujuan untuk menggalakkan potensi peluang perniagaan dengan meningkatkan keupayaan Perusahaan Kecil dan Sederhana (PKS) dalam industri Makanan dan Minuman Halal (F&B);

ii. *Program Teman TEKUN 2.0*

Program ini menyediakan kemudahan pembiayaan yang lebih mudah dan cepat untuk pembangunan perniagaan; dan

iii. *Program Tunas Usahawan Belia Bumiputera (TUBE)*

Program ini merupakan inisiatif Kerajaan bagi menggalakkan generasi belia menceburi bidang perniagaan.

Kementerian sedang dalam usaha untuk menambahbaik dan “*rebrand*” program-program tersebut supaya lebih tersasar dan mencapai objektif yang dikehendaki.

Sekian, terima kasih.

PEMBERITAHUAN PERTANYAAN DEWAN RAKYAT

PERTANYAAN : LISAN

DARIPADA : TUAN WONG CHEN
[SUBANG]

TARIKH : 29 OKTOBER 2018 (ISNIN)

SOALAN : 21

Tuan Wong Chen (Subang) minta **PERDANA MENTERI** menyatakan kenapa semua ahli Parlimen pembangkang tidak perlu mengisytiharkan aset mereka.

JAWAPAN: YB DATUK LIEW VUI KEONG
MENTERI DI JABATAN PERDANA MENTERI

Tuan Yang di-Pertua,

1. Anggota Pentadbiran dan Ahli-Ahli Parlimen di bawah Pakatan Harapan telah pun diarah untuk membuat perisytiharan harta melalui akuan bersumpah diserahkan kepada YAB Perdana Menteri dan disalinkan kepada pihak Suruhanjaya Pencegahan Rasuah Malaysia (SPRM). Perisytiharan harta ini merangkumi aset sendiri, pasangan dan anak-anak berumur 21 tahun ke bawah.
2. Kerajaan telah bersetuju supaya perisytiharan harta Anggota Pentadbiran dan Ahli-Ahli Parlimen dipaparkan di Portal SPRM mulai pada 1 November 2018.
3. Kerajaan juga telah bersetuju supaya perisytiharan harta ini turut dilaksanakan oleh pegawai-pegawai awam di pejabat Menteri dan Timbalan Menteri iaitu Setiausaha Politik, Setiausaha Sulit Kanan dan Setiausaha Sulit. Kerajaan komited untuk memastikan pelaksanaan arahan ini dibuat sebagaimana yang telah pun termaktub dalam Kod Etika Anggota Pentadbiran dan Ahli-ahli Parlimen Kerajaan.
4. Keseriusan Kerajaan untuk mewujudkan sistem governans yang baik dan telus telah dimulakan oleh Anggota Pentadbiran dan Ahli-Ahli Parlimen Kerajaan Pakatan Harapan yang mengisytiharkan harta

mereka kepada YAB Perdana Menteri dan SPRM selepas PRU14. Justeru dasar yang baik ini akan diperluaskan kepada Ahli Parlimen pembangkang yang akan dilaksanakan oleh pihak Parlimen. Semua Ahli Parlimen tanpa mengira parti politik yang diwakilinya perlu mengisytiharkan harta bagi menunjukkan ketelusan dan komitmen ke arah negara bebas rasuah atau sebarang perlakuan jenayah yang lain.

5. Dalam hal ini, untuk semua Ahli Parlimen dimana pihak Pembangkang tidak dikecualikan perlu mengisytiharkan harta kepada Yang di-Pertua Dewan Rakyat dan disalinkan kepada pihak SPRM. Semua ini memerlukan pindaan terhadap *Standing Order* yang berkenaan. Ahli-ahli Parlimen pembangkang diharap akan menyahut seruan ini bagi menunjukkan komitmen ke arah kepemimpinan yang bebas rasuah dengan melaksanakan perisytiharan harta seperti yang telah ditetapkan.

Sekian, terima kasih.

PEMBERITAHUAN PERTANYAAN BAGI JAWAB LISAN
DEWAN RAKYAT MALAYSIA

PERTANYAAN : JAWAB LISAN

**DARIPADA : PUAN ALICE LAU KIONG YIENG
[LANANG]**

TARIKH : 29 OKTOBER 2018

SOALAN : Puan Alice Lau Kiong Yieng [Lanang]
minta **MENTERI LUAR NEGERI**
menyatakan secara terperinci senarai
ketua perwakilan Malaysia ke luar negara
(iaitu Duta Besar, Konsul Jeneral,
Pesuruhjaya Tinggi dan sebagainya) yang
dilantik sejak 2009-2018 dan senaraikan
bilangan yang merupakan lantikan politik.

JAWAPAN

Tuan Yang di-Pertua,

Saya mengucapkan terima kasih kepada Yang Berhormat Lanang atas pertanyaan yang dikemukakan.

2. Untuk makluman Dewan yang mulia, ketika ini Perwakilan Malaysia di luar negeri diketuai oleh 48 orang Duta Besar, 11 orang Pesuruhjaya Tinggi, dua (2) orang Wakil Tetap ke Pertubuhan Bangsa-Bangsa Bersatu, seorang (1) Wakil Tetap ke ASEAN, 18 orang Konsul Jeneral dan dua (2) orang Konsul yang dilantik daripada kalangan pegawai-pegawai Kementerian Luar Negeri berdasarkan kewibawaan, kebolehan, personaliti dan ciri-ciri kepimpinan yang telah dipamerkan sepanjang perkhidmatan dalam sektor luar negeri.

3. Di antara tahun 2013 sehingga pertengahan tahun 2018, seramai lapan (8) orang Ketua-Ketua Perwakilan Malaysia telah dilantik secara lantikan politik oleh Kerajaan terdahulu. Daripada jumlah tersebut, dua (2) orang Ketua Perwakilan Malaysia iaitu Tan Sri Zulhasnan Rafique, mantan Duta Besar Malaysia ke Amerika Syarikat telah meletakkan jawatan pada 23 April 2018 manakala Dato' Sri Hasan Malek telah menamatkan perkhidmatan beliau sebagai Duta Besar Malaysia ke Kemboja pada 31 Mac 2018.

4. Seramai enam (6) orang Ketua Perwakilan Malaysia Lantikan Politik yang lain telah ditamatkan kontrak perkhidmatan pada 30 Jun 2018. Ketua Perwakilan Malaysia berkenaan ialah Dato' Seri Zahrain

Mohamed Hashim (Duta Besar Malaysia ke Indonesia), Tan Sri Bernard Giluk Dompok (Duta Besar Malaysia ke Vatican City), Datuk Ghulam Jelani Khanizam (Pesuruhjaya Tinggi Malaysia ke Brunei Darussalam), Dato' Blanche Olbery (Duta Besar Malaysia ke Finland), Datuk Adeline Leong (Presiden Pusat Persahabatan dan Perdagangan Malaysia di Taipei) dan Dato' Siow Chen Pin (Konsul Jeneral Malaysia di Kunming).

5. Daripada tahun 2009 hingga 2018, secara keseluruhannya, seramai 16 orang Ketua Perwakilan lantikan politik telah ditempatkan di 10 buah Perwakilan Malaysia di luar negeri.

Sekian, terima kasih.

DEWAN RAKYAT
PEMBERITAHUAN PERTANYAAN
MESYUARAT KEDUA, PENGGAL PERTAMA
PARLIMEN KEEMPAT BELAS (2018)

PERTANYAAN : LISAN
TARIKH : 29 OKTOBER 2018 (ISNIN)
DARIPADA : TUAN PANG HOK LIONG
[LABIS]
SOALAN : 23

Tuan Pang HokLiong [Labis] minta **PERDANA MENTERI** menyatakan bilakah Kerajaan akan membubarkan Organisasi Perisikan Luar Malaysia atau Malaysia External Intelligence Organisation (MEIO) memandangkan kegiatan mereka tidak baik untuk Kerajaan/Negara dan ia telah disalahguna oleh Kerajaan Barisan Nasional seperti mana skandal bekas pengarahnya, Datuk Hasanah Abdul Hamid baru-baru ini.

JAWAPAN: YB DATUK LIEW VUI KEONG
MENTERI DI JABATAN PERDANA MENTERI

Tuan Yang di-Pertua,

1. Untuk makluman Ahli Yang Berhormat, Kerajaan akan terus mengekalkan organisasi ini yang lebih dikenali dengan Bahagian Penyelidikan, Jabatan Perdana Menteri.
2. Kerajaan sedar apa yang berlaku semasa pentadbiran yang lalu bukanlah kesalahan Bahagian tersebut tetapi kerana terdapatnya “*rogue*

agents” yang membelakangkan kepentingan Negara untuk kepentingan diri. Sehubungan itu, untuk memastikan Bahagian ini kekal relevan, Kerajaan akan memperketatkan *Standard Operating Procedure* (SOP), tatacara operasi dan sebagainya supaya apa yang berlaku sebelum ini tidak berulang. Malah, Kerajaan juga telah melantik Ketua Pengarah baharu yang diyakini mampu untuk meletakkan kembali Bahagian tersebut di landasan yang betul serta menepati tujuan asal penubuhannya.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL PERTAMA,
PARLIMEN KEEMPAT BELAS**

PERTANYAAN : LISAN
DARIPADA : Y.B. TAN SRI DATUK SERI PANGLIMA HAJI
ANNUAR BIN HAJI MUSA
[KETEREH]
TARIKH : 29 OKTOBER 2018 (ISNIN)

SOALAN NO. 24

Y.B. TAN SRI DATUK SERI PANGLIMA HAJI ANNUAR BIN HAJI MUSA [KETEREH] minta **MENTERI KEWANGAN** menyatakan bilakah kutipan Tabung Harapan akan dihentikan dan apakah perincian kegunaan kutipan berkenaan setelah mengambil maklum kenyataan Menteri bahawa ekonomi negara kukuh dan kekal berdaya tahan yang tinggi.

JAWAPAN

Tuan Yang Dipertua,

Untuk makluman Yang Berhormat,

Penubuhan Tabung Harapan (THM) adalah hasil daripada kesedaran dan keprihatinan rakyat Malaysia terhadap kedudukan hutang negara dan semangat patriotik rakyat yang sayangkan negara untuk menghulurkan derma dan sumbangan ikhlas mengikut kemampuan mereka kepada Kerajaan.

Kedudukan hutang negara yang berjumlah RM1.087 trilion (sehingga Disember 2017), terutamanya berpunca daripada hutang-hutang 1MDB, jelas sekali berada pada tahap yang membimbangkan. Walaubagaimanapun, sebagai sebuah Kerajaan yang prihatin, rakyat tidak seharusnya dibebankan dengan pengurusan kewangan Negara dan Kerajaan bercadang supaya kutipan dana THM akan dihentikan dalam masa terdekat.

Semua hasil derma dan sumbangan yang diterima THM akan digunakan untuk pembayaran hutang Kerajaan Persekutuan sahaja sebagaimana yang telah ditetapkan dalam arahan amanahnya. Mekanisme pembayaran hutang negara menggunakan dana THM ini akan dirangka dan diperhalusi oleh Jawatankuasa Akaun Amanah THM agar proses pembayaran hutang tersebut dapat dilaksanakan secara teratur, telus, berintegriti mengikut peraturan dan perundangan semasa yang berkuat kuasa. Sebuah syarikat perakaunan antarabangsa juga akan dilantik untuk mengaudit THM. Sehingga 25 Oktober 2018, 3 petang, jumlah sumbangan adalah RM196,247,862.08.

Walaupun THM tidak mungkin boleh melangsaikan semua hutang Kerajaan Persekutuan yang diwarisinya, THM akan kekal menjadi simbol semangat taat setia dan patriotisme rakyat Malaysia untuk melangsaikan hutang negara.

**PEMBERITAHUAN PERTANYAAN JAWAB LISAN DEWAN RAKYAT
MESYUARAT KEDUA, PENGGAL PERTAMA,
PARLIMEN KEEMPATBELAS**

PERTANYAAN : JAWAB LISAN

**DARIPADA : YB DATUK SERI PANGLIMA WILFRED MADIUS
TANGAU (TUARAN)**

TARIKH : 29 OKTOBER 2018

SOALAN :

**Datuk Seri Panglima Madius Tangau [Tuaran] minta MENTERI
DALAM NEGERI** menyatakan berapakah bilangan pemegang dokumen
IMM13 pada masa ini dan negara asal mereka.

JAWAPAN

Tuan Yang Di Pertua,

Untuk makluman Yang Berhormat, dokumen IMM.13 merupakan dokumen terperingkat yang dikeluarkan melalui keputusan-keputusan tertentu oleh pihak Pengurusan Tertinggi Kerajaan kepada mana-mana individu atau kumpulan tertentu sahaja.

Bagi jumlah pemegang IMM.13 yang aktif di Sabah, sehingga tahun 2017, statistik oleh Jabatan Imigresen Malaysia merekodkan sejumlah 53,237 orang yang terdiri daripada 26,578 orang lelaki dan 26,569 orang wanita.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL PERTAMA
PARLIMEN KEEMPAT BELAS**

PERTANYAAN : LISAN

**DARIPADA : DATUK LIEW CHIN JIN @ CHRISTINA LIEW
[TAWAU]**

TARIKH : 29 OKTOBER 2018 (ISNIN)

SOALAN NO. 26

Minta **MENTERI PENGANGKUTAN** menyatakan apakah Kerajaan mempunyai perancangan untuk menaik taraf Lapangan Terbang Tawau sebagai lapangan terbang antarabangsa untuk membolehkan lapangan terbang tersebut dapat menerima penerbangan terus antarabangsa berjadual memandangkan kawasan Pantai Timur Sabah sangat berpotensi untuk dibangunkan sebagai destinasi pelancongan unggul.

JAWAPAN

Yang Dipertua,

1. Kerajaan tidak mempunyai perancangan untuk menaik taraf Lapangan Terbang Tawau sebagai lapangan terbang berstatus antarabangsa. Pada masa ini, Malaysia telah pun mempunyai 6 buah lapangan terbang antarabangsa iaitu Lapangan Terbang Antarabangsa Kuala Lumpur (KLIA), Lapangan Terbang Antarabangsa Kota Kinabalu (KKIA), Lapangan Terbang Antarabangsa Kuching (KIA), Lapangan Terbang Antarabangsa Pulau Pinang, Lapangan Terbang Antarabangsa Langkawi dan Lapangan Terbang Antarabangsa Senai (Senai).
2. Lapangan-lapangan terbang lain termasuk Lapangan Terbang Tawau adalah berperanan sebagai *feeder* kepada KKIA.
3. Walaupun Lapangan Terbang Tawau tidak dikategorikan sebagai lapangan terbang antarabangsa, lapangan terbang ini boleh mengendalikan operasi penerbangan antarabangsa berjadual dan tidak berjadual seperti lapangan-lapangan terbang di Melaka, Kuantan dan Ipoh.
4. Pada masa ini, Lapangan Terbang Tawau mengendalikan penerbangan terus sebanyak 158 kali penerbangan seminggu dari KLIA, Senai dan KKIA. Malaysia Airlines dan AirAsia menyediakan perkhidmatan penerbangan terus dari KLIA ke Lapangan Terbang Tawau dengan jumlah kekerapan keseluruhan sebanyak 49 kali seminggu. AirAsia dan MAS dan MASwings turut menyediakan penerbangan terus dari KKIA ke Lapangan Tawau dengan jumlah

kekerapan sebanyak 88 kali seminggu. Di samping itu, terdapat penerbangan antarabangsa yang menghubungkan Lapangan Terbang Tawau dan Lapangan Terbang Tarakan, Indonesia yang dikendalikan oleh MASwings dengan kekerapan sebanyak 3 kali seminggu.

5. Untuk makluman, syarikat operasi lapangan terbang MAHB mempunyai perancangan untuk mempertingkatkan dan memperkukuhkan perkhidmatan Lapangan Terbang Tawau melalui Pelan Pemodenan Lapangan Terbang Tawau yang dilaksanakan mulai tahun 2019. Melalui pelan ini, antara lain, MAHB akan menaiktaraf fasiliti di dewan berlepas, penyediaan surau baru, tandas dan tambahan *pre-screening machine*. Di samping itu, MAHB juga mempunyai perancangan untuk mempertingkatkan kapasiti pengendalian penumpang daripada 1.5 juta penumpang setahun kepada 2.5 juta penumpang setahun.
6. Lapangan Terbang Tawau dikategorikan di bawah lapangan terbang kategori kod C yang membolehkan pesawat seperti Airbus A320 dan Boeing 737 untuk melakukan penerbangan ke negara-negara ASEAN dan selatan China.
7. Menurut MAHB, untuk tahun 2018 dan 2019 dana telah disediakan untuk menaiktaraf fasiliti di Lapangan Terbang Tawau seperti penyediaan surau baru, tandas baru serta tambahan satu *pre-screening machine* bagi kemudahan dan keselesaan penumpang. Dewan berlepas akan dinaiktaraf dan pintu pelepasan akan ditambah seiring dengan pertumbuhan jumlah penumpang yang positif di Lapangan Terbang Tawau. Pelan Interim Optimum ini dijadualkan akan siap dilaksanakan pada Disember 2019.

8. Melalui pelan Pemodenan Lapangan Terbang Tawau, untuk jangka masa panjang pula, kawasan bangunan terminal sedia ada akan dioptimumkan dengan pertambahan kawasan yang minimum, penggunaan kawasan sedia ada dan pengubahsuaian pelan susun atur dan penambahan fasiliti untuk menampung keperluan operasi lapangan terbang. Bangunan terminal akan dinaiktaraf dengan konsep seni bina dalaman dan luaran yang akan mencirikan kecantikan semula jadi kawasan Pantai Timur Sabah dan kawasan pelancongan di Tawau.
9. Tumpuan turut diberikan kepada segmen komersial di mana kedai-kedai komersial dan peruncitan turut diperbesarkan dan dinaiktaraf agar aktiviti komersial turut seiring berkembang maju. Potensi segmen kargo akan dikembangkan dengan menaiktaraf bangunan kargo bagi menyokong aktiviti tersebut yang melibatkan agensi lain seperti MAS Kargo dan POS Aviation.
10. MAHB akan membuat kunjungan dan pembentangan mengenai rancangan pelan pemodenan Lapangan Terbang Tawau kepada Kerajaan Negeri Sabah pada 30hb Oktober 2018.
11. Pemodenan Lapangan Terbang Tawau ini dijangka dapat menampung kapasiti penumpang sehingga 2.5 juta setahun dan dianggarkan dapat bertahan sehingga tahun 2032.

PEMBERITAHUAN PERTANYAAN BAGI JAWAPAN LISAN
MESYUARAT KEDUA, PENGGAL PERTAMA,
PARLIMEN KEEMPAT BELAS,
MAJLIS MESYUARAT DEWAN RAKYAT

PERTANYAAN : LISAN

DARIPADA : YB PUAN KASTHURIRAANI A/P PATOO
[BATU KAWAN]

TARIKH : 29 OKTOBER 2018
MENJAWAB

SOALAN : 27

YB PUAN KASTHURIRAANI A/P PATOO [BATU KAWAN] minta **PERDANA MENTERI** menyatakan bilakah Akta Hasutan 1948, Undang-undang Kesalahan Keselamatan (SOSMA), Akta Pencegahan Jenayah (POCA), Akta Mesin Cetak dan Penerbitan 1984 dan Akta Majlis Keselamatan Negara 2016, Akta Universiti dan Kolej Universiti 1971 akan dimansuhkan dan apakah status setiap perincian tersebut.

JAWAPAN: **YB DATUK LIEW VUI KEONG**
MENTERI DI JABATAN PERDANA MENTERI
(UNDANG-UNDANG)

Tuan Yang di-Pertua,

1. Rancangan untuk memansuhkan undang-undang berkaitan keselamatan seperti Akta Kesalahan Keselamatan (Langkah-Langkah Khas) 2012 [*Akta 747*], Akta Pencegahan Jenayah 1959 [*Akta 297*], Akta Pencegahan Keganasan 2015 [*Akta 769*] dan Akta Hasutan 1948 [*Akta 15*] adalah dalam proses (*work in progress*). Akta-akta tersebut adalah antara 113 akta-akta yang saya telah umumkan pada 24 September 2018 yang sedang dikaji sama ada untuk dimansuhkan atau dipinda.

2. Ini adalah sebab Kementerian Dalam Negeri melalui Jawatankuasa Khas dan Jawatankuasa Teknikal Kajian Undang-Undang berkaitan Keselamatan sedang mengkaji undang-undang tersebut.

3. Jawatankuasa ini dianggotai oleh wakil daripada Jabatan Peguam Negara, Polis Diraja Malaysia (PDRM), Pejabat Ketua Pendaftar Mahkamah Persekutuan Malaysia, Badan Peguam Malaysia, Suruhanjaya Hak Asasi Manusia (SUHAKAM) dan badan bukan kerajaan (NGO) yang bertujuan untuk mengkaji setiap peruntukan dalam undang-undang berkenaan keselamatan dengan lebih terperinci.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL PERTAMA,
PARLIMEN KEEMPAT BELAS**

PERTANYAAN : LISAN
DARIPADA : YB TUAN AWANG HUSAINI BIN SAHARI
[PUTATAN]
TARIKH : 29 OKTOBER 2018 (ISNIN)

SOALAN NO. 28

Minta **MENTERI KESIHATAN** menyatakan apakah langkah drastik Kementerian untuk mengatasi nisbah pesakit berbanding Doktor Perubatan (1:1,200) [Nisbah Kebangsaan 1:600] dan nisbah pesakit berbanding Doktor Pergigian (1:12,000) [Nisbah Kebangsaan 1:400] bagi memberi rawatan kepada penduduk Sabah seramai 3,063,600 orang.

JAWAPAN

Yang di-Pertua,

Untuk makluman Ahli Yang Berhormat, nisbah petugas kesihatan kepada penduduk adalah merupakan indikator yang diguna pakai di peringkat antarabangsa, bukannya nisbah petugas kesihatan kepada pesakit. Antara contoh nisbah petugas kesihatan kepada penduduk adalah seperti:

- nisbah doktor perubatan kepada penduduk, dan
- nisbah doktor pergigian kepada penduduk.

Pada tahun 2016, nisbah doktor perubatan kepada penduduk adalah 1 doktor perubatan kepada 632 penduduk Malaysia, manakala bagi negeri Sabah, nisbah adalah 1 doktor perubatan kepada 1,187 penduduk Sabah.

Manakala bagi doktor pergigian pula, nisbah adalah 1 doktor pergigian kepada 4,406 penduduk Malaysia dan 1 doktor pergigian kepada 9,211 penduduk Sabah.

Bagi memberi perkhidmatan kesihatan terbaik kepada seluruh negara termasuk kepada penduduk di Sabah, Kerajaan telah melaksanakan pelbagai inisiatif untuk menambahkan bilangan Pegawai Perubatan. Antara langkah yang telah diambil adalah seperti berikut :

- i) Menggalakkan lebih ramai Pegawai Perubatan Pakar ditempatkan di pedalaman khususnya Sabah. Kerajaan telah menetapkan supaya penempatan Pegawai Perubatan Pakar dibuat secara giliran di mana tempoh penempatan minima adalah selama 6 bulan. Pada masa ini, tempoh penempatan tersebut telah dipanjangkan kepada 1 tahun bagi memastikan kesinambungan perkhidmatan kepakaran di kawasan berkenaan;

NO SOALAN: 28

- ii) Menggalakkan lebih ramai Pegawai Perubatan melanjutkan pengajian dalam program Sarjana Kepakaran melalui peningkatan slot tajaan Hadiah Latihan Persekutuan daripada 800 slot sehingga tahun 2014 kepada 1,000 slot mulai tahun 2015; dan
- iii) Menggalakkan Pegawai Perubatan yang berminat untuk menjadi Pakar menjalani latihan kepakaran melalui program laluan *paralel*;

Selain itu, bagi menarik minat Pegawai Perubatan dan Pegawai Pergigian yang berkhidmat di Sabah, insentif dan elaun khas yang disediakan Kerajaan ialah:

- i) Bayaran Insentif Wilayah bagi pegawai di Sabah atas kadar peratusan 12.5 hingga 25 peratus daripada gaji bulanan;
- ii) Elaun Khas Mengikut Lokasi dan Tahap Kesusahan (EKMLTK) kepada Pegawai Perubatan yang berkhidmat di fasiliti kesihatan di kawasan pedalaman Sabah yang diluluskan, atas kadar RM500 atau RM1000 atau RM1500 berdasarkan kategori pedalaman fasiliti tersebut;
- iii) Bayaran Insentif Pedalaman bagi pegawai di Sabah atas kadar 10 peratus dari gaji bulanan;
- iv) Bayaran Insentif Pegawai Perubatan Pakar di Sabah, Sarawak dan Wilayah Persekutuan Labuan berkuatkuasa 1 Julai 2016;
- v) Bayaran Insentif Penempatan Pakar Perubatan/Pergigian di Fasiliti Kesihatan Di Sabah dan Sarawak; dan
- vi) Pegawai Perubatan yang berkhidmat di Sabah diberi merit 5% markah tambahan dalam markah keseluruhan bagi pemilihan calon yang akan menjalani latihan kepakaran untuk Program Sarjana Perubatan.

NO SOALAN: 28

Untuk Pegawai Perubatan yang terlibat dalam pasukan Perkhidmatan Perubatan Udara layak diberikan Bayaran Insentif Perudara sebanyak RM30 bagi satu penerbangan pergi dan balik.

Di samping itu, bagi memastikan lebih ramai Pegawai Pergigian dapat ditempatkan di negeri Sabah, Kerajaan juga:

- i) Memberi keutamaan kepada Pegawai Pergigian yang berasal dari Sabah untuk mendapat Hadiah Latihan Persekutuan (HLP) bagi melanjutkan pelajaran dalam bidang kepakaran setelah memenuhi kriteria yang ditetapkan;
- ii) Menempatkan Pegawai Pergigian mengikut giliran. Pegawai yang telah berkhidmat lebih dari dua (2) tahun diberi keutamaan untuk kembali bertugas di Semenanjung Malaysia; dan
- iii) Membina lebih banyak fasiliti pergigian bagi kemudahan rakyat mendapatkan rawatan pergigian supaya dapat menempatkan lebih ramai Pegawai dan Pakar Pergigian.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL PERTAMA,
PARLIMEN KEEMPAT BELAS**

PERTANYAAN : LISAN

**DARIPADA : DATO' SRI HAJI FADILLAH BIN YUSOF
[PETRAJAYA]**

TARIKH : 29 OKTOBER 2018 (ISNIN)

SOALAN NO. 29

Minta **MENTERI HAL EHWAL EKONOMI** menyatakan sudahkah Kerajaan Persekutuan mengenalpasti mekanisme bagi melaksanakan pembayaran royalti 20% seperti yang dijanjikan dalam manifesto pilihanraya yang lepas.

JAWAPAN

Yang di-Pertua,

Sepertimana Ahli Yang Berhormat ambil maklum, Mesyuarat Pertama, Penggal Pertama Parlimen Keempat Belas yang lalu semasa penggulungan perbahasan menjunjung kasih Titah Seri Paduka Baginda Yang Di-Pertuan Agong pada 1 Ogos 2018, saya telah menyatakan antara lain, secara panjang lebar mengenai bayaran tunai (*cash payment*) atau lebih dikenali sebagai royalti minyak dalam Dewan yang mulia ini.

Saya juga telah menyatakan bahawa Kerajaan bercadang untuk menubuhkan Jawatankuasa Khas Kabinet yang dianggotai oleh wakil-wakil daripada Semenanjung, Sabah dan Sarawak yang mempunyai kepakaran dalam hal-hal berkaitan bertujuan untuk menyemak, mengkaji dan menambahbaik secara adil Perjanjian Malaysia 1963.

Sukacita saya maklumkan bahawa Mesyuarat Jemaah Menteri pada 5 September 2018 telah bersetuju dengan penubuhan Jawatankuasa Khas Kabinet bagi menyemak dan membuat pengesyoran kepada Kerajaan berhubung pelaksanaan hak-hak dan autonomi Sabah dan Sarawak selaras dengan peruntukan-peruntukan yang terkandung dalam Perlembagaan Malaysia 1963.

Tumpuan utama Jawatankuasa Khas Kabinet adalah kepada pelaksanaan perkara-perkara yang terkandung dalam manifesto Pakatan Harapan serta perkara-perkara berbangkit seperti bayaran tunai atau royalti minyak dan sebagainya yang akan dibincangkan secara berperingkat.

Selain itu juga wakil-wakil daripada Semenanjung, Sabah dan Sarawak, yang mempunyai kepakaran dan pengetahuan dalam hal-hal berkaitan, akan dilantik untuk menganggotai Jawatankuasa Khas Kabinet ini.

Senarai keanggotaan tersebut akan dikemukakan kepada YAB Perdana Menteri terlebih dahulu untuk persetujuan supaya tidak terlalu ramai dan mengikut kesesuaian kepakaran dan pengetahuan. Senarai yang telah dimuktamadkan akan diumumkan oleh Menteri di Jabatan Perdana Menteri (Undang-undang).

Untuk makluman Ahli Yang Berhormat, Jawatankuasa Khas Kabinet akan memberikan laporan terperinci kepada Kerajaan dalam tempoh 6 bulan dari tarikh penubuhan untuk pelaksanaan segera.

Jabatan Perdana Menteri melalui Bahagian Hal Ehwal Undang-Undang (BHEUU) sebagai urus setia Jawatankuasa Khas Kabinet sedang meneliti perkara di atas, supaya kepentingan semua pihak diambil kira selaras dengan Perjanjian Malaysia 1963.

Sehubungan itu, perkara-perkara yang dibangkitkan Ahli Yang Berhormat mengenai mekanisme pembayaran royalti minyak, akan turut diambilkira dalam Jawatankuasa Khas Kabinet tersebut sehingga laporan dikeluarkan kepada Kerajaan untuk pelaksanaan oleh pihak-pihak berkaitan.

Sekian, terima kasih.

29 Oktober 2018

Kementerian Hal Ehwal Ekonomi

PEMBERITAHUAN PERTANYAAN
MESYUARAT KEDUA, PENGGAL PERTAMA,
PARLIMEN KEEMPAT BELAS,
DEWAN RAKYAT

PERTANYAAN : LISAN

DARIPADA : TUAN SANISVARA NETHAJI RAYER
A/L RAJAJI [JELUTONG]

TARIKH : 29 OKTOBER 2018

SOALAN : 30

Tuan Sanisvara Nethaji Rayer A/L Rajaji [Jelutong] minta **PERDANA MENTERI** menyatakan sama ada Kerajaan bercadang untuk menaikkan gaji dan elaun bagi semua anggota dan kakitangan beruniform seperti Polis, Tentera, Kastam, Bomba dan lain-lain lagi.

JAWAPAN: YB DATUK LIEW VUI KEONG

MENTERI DI JABATAN PERDANA MENTERI

(UNDANG-UNDANG

Tuan Yang di-Pertua,

Untuk makluman Ahli Yang Berhormat, semua penjawat awam adalah dibayar gaji berdasarkan jadual gaji yang berkuat kuasa. Kerajaan menetapkan bayaran gaji yang merupakan upah kepada penjawat awam yang meliputi elemen untuk makanan, rumah dan pakaian (*food, shelter and clothing*). Di samping itu, penjawat awam juga menerima imbuhan tetap dan pelbagai jenis elaun berdasarkan kepada kriteria-kriteria tertentu seperti kos sara hidup yang meningkat.

Untuk makluman, kali terakhir saraan bagi Perkhidmatan Polis, Tentera, Kastam dan Bomba termasuk keseluruhan perkhidmatan awam telah dikaji dan dilaksanakan pada 1 Julai 2016 melalui Pekeliling Perkhidmatan Bilangan 1 Tahun 2016. Penambahbaikan-penambahbaikan yang dilaksanakan adalah berdasarkan prinsip kadar upah untuk kerja, kelayakan masuk dan latihan, dalam masa yang sama mengekalkan relativiti dan pariti antara gred dan skim perkhidmatan.

Dalam hal ini, gaji yang diterima bagi perkhidmatan-perkhidmatan berkenaan adalah bersesuaian dengan kerja yang dilaksanakan. Elaun-elaun turut diberikan sebagai tambahan kepada gaji yang diterima bagi mengiktiraf risiko, kemahiran, kos sara hidup, penempatan, perkhidmatan dan tugas serta kompetensi tambahan pegawai dan anggota.

Kerajaan sentiasa dari semasa ke semasa menimbang permohonan serta membuat kajian semakan gaji dan elaun Perkhidmatan Polis, Tentera, Kastam dan Bomba serta keseluruhan perkhidmatan awam amnya berdasarkan prinsip-prinsip tertentu. Dalam melaksanakan kajian semakan gaji dan elaun tersebut, ianya perlu diberi pertimbangan dan perhatian secara berhati-hati mengambil kira pelaksanaannya memberi implikasi kepada perbelanjaan mengurus yang tinggi

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL PERTAMA
PARLIMEN KEEMPAT BELAS**

PERTANYAAN : LISAN

**DARIPADA : PUAN HAJAH SITI ZAILAH BINTI MOHD
YUSOFF [RANTAU PANJANG]**

TARIKH : 29 OKTOBER 2018 (ISNIN)

SOALAN NO.31

Minta **MENTERI PENDIDIKAN** menyatakan adakah Kementerian bersedia menilai semula pelaksanaan arahan bayaran balik pinjaman PTPTN melalui potongan gaji mandatori maksimum penjawat awam agar berpadanan dengan jumlah perbelanjaan kos sara hidup bulanan mereka.

JAWAPAN

Tuan Yang di-Pertua,

Untuk makluman Ahli Yang Berhormat, kajian holistik mengenai dasar baharu bayaran balik pinjaman Perbadanan Tabung Pendidikan Tinggi Nasional (PTPTN) telah selesai dilaksanakan dan akan dibentangkan ke Mesyuarat Jemaah Menteri untuk dimuktamadkan.

Cadangan pelaksanaan dasar baharu tersebut telah mengambil kira kesan kewangan yang minimum kepada PTPTN bagi memastikan kelestarian dapat dikekalkan, di samping merealisasikan manifesto Kerajaan Pakatan Harapan melalui pengurangan bebanan bayaran balik kepada peminjam.

Antara inti pati cadangan pelaksanaan dasar baharu tersebut ialah kaedah bayaran balik bulanan secara potongan pinjaman berjadual dan kadar potongan atau bayaran balik pinjaman PTPTN akan ditentukan berdasarkan peratusan tertentu daripada pendapatan bulanan peminjam. Sekiranya cadangan dasar baharu bayaran balik pinjaman PTPTN dilaksanakan, pelarasan semula amaun potongan pendapatan peminjam perlu dilaksanakan selaras dengan cadangan peratusan potongan yang telah ditetapkan.

RJM51

PEMBERITAHUAN PERTANYAAN BAGI JAWAPAN LISAN
MESYUARAT KEDUA PENGGAL PERTAMA,
PARLIMEN KEEMPAT BELAS,
MAJLIS MESYUARAT DEWAN RAKYAT

PERTANYAAN : LISAN

DARIPADA : YB TUAN NOOR AMIN BIN AHMAD

TARIKH : 29 OKTOBER 2018

SOALAN :

Tuan Noor Amin bin Ahmad [Kangar] minta **MENTERI TENAGA MANUSIA** menyatakan apakah langkah-langkah yang telah dan boleh diambil untuk memastikan pekerja-pekerja yang layak, menerima caruman KWSP dan PERKESO oleh majikan mereka.

PR-1412-L01907

JAWAPAN

Tuan Yang Di Pertua,

1. Pertubuhan Keselamatan Sosial (PERKESO) menguatkuasakan Akta Keselamatan Sosial 1969 (Akta 4), Akta Keselamatan Sosial Pekerjaan Sendiri 2017 (Akta 789) dan Akta Sistem Insurans Pekerjaan 2017 (Akta 800) bagi memberi perlindungan keselamatan sosial kepada pekerja dan tanggungannya yang layak serta pekerja yang kehilangan pekerjaan.

2. Aktiviti penguatkuasaan merupakan salah satu fungsi utama PERKESO selain daripada pembayaran faedah. Aktiviti ini dijalankan bagi mengesan dan memastikan majikan mendaftar dan mencarum dengan PERKESO. Antara tindakan yang diambil terhadap majikan yang tidak dan gagal mendaftar dan mencarum termasuklah pengkompaunan dan pendakwaan.

3. Tindakan pengkompaunan boleh diambil di bawah Seksyen 95(A) Akta 4 bagi kesalahan-kesalahan yang ditetapkan dan kadar kompaun yang boleh dikenakan adalah tidak melebihi lima puluh peratus daripada amaun denda maksimum bagi sesuatu kesalahan itu. Sementara itu, tindakan pendakwaan boleh diambil oleh PERKESO sebagaimana diperuntukkan di bawah Seksyen 94 Akta 4. Di bawah seksyen ini, jika disabitkan kesalahan boleh dikenakan hukuman penjara selama tempoh yang boleh sampai dua tahun atau denda tidak melebihi RM10,000.00 atau kedua-duanya sekali.

4. Program Pemutihan merupakan satu inisiatif “*soft approach*” kepada majikan dengan tujuan memberi peluang untuk majikan yang tidak berdaftar dengan PERKESO untuk berdaftar sepanjang tempoh pemutihan. Pada tahun 2017, impak pendaftaran majikan bulan pemutihan adalah sebanyak 5% berbanding dengan bulan Ops Kesan dan bulan sebelumnya.

5. PERKESO telah melaksanakan Ops Kesan sejak tahun 2009 sebagai sebahagian daripada aktiviti penguatkuasaan bertujuan memastikan majikan akur dengan peruntukan di bawah Akta. Pada tahun 2018, sepanjang Program Ops Kesan Kebangsaan diadakan pada bulan Ogos sebanyak 6,009 majikan telah dilawati dan 450 majikan dikesan gagal mendaftar manakala sebanyak 782 kompaun telah dikeluarkan. Pada tahun 2017, sebanyak 7,314 premis majikan telah dilawati dan sebanyak 1,636 notis kompaun dikeluarkan terhadap majikan yang gagal mendaftar perusahaan mereka.

6. Menerusi aktiviti penguatkuasaan yang melibatkan 215 anggota pegawai pemeriksa di seluruh negara, sehingga bulan Ogos 2018 sebanyak 1,640 kompaun telah dikeluarkan dan 730 kes pendakwaan ke atas majikan telah diambil. Pada tahun 2017 sebanyak 2,691 majikan telah dikenakan tindakan kompaun dan 1,222 majikan diambil untuk tindakan mahkamah. Manakala pada tahun 2016, sejumlah 3,010 majikan telah dikenakan tindakan kompaun dan 1,311 majikan pula disyorkan untuk tindakan mahkamah di bawah Akta 4.

7. Selain itu, antara tindakan-tindakan yang diambil oleh PERKESO secara berterusan bagi memastikan majikan yang layak didaftarkan dan mencarum adalah seperti berikut:

- i. pemeriksaan secara berjadual ke premis majikan oleh pegawai pemeriksaan di seluruh Negara;
- ii. *Smart Detection* dengan melaksanakan aktiviti pengesanan ke atas majikan dengan kerjasama di antara agensi iaitu Kumpulan Wang Simpanan Pekerja (KWSP), Lembaga Hasil Dalam Negeri (LHDN), Suruhanjaya Syarikat Malaysia (SSM), Kementerian Dalam Negeri (KDN), Jabatan Tenaga Kerja dan lain-lain agensi berkaitan;
- iii. mengadakan hebahan melalui media cetak secara berterusan setiap tahun. Pada tahun 2018, sehingga September sebanyak 361 program hebahan telah diadakan manakala sebanyak 608 hebahan pada tahun tahun 2017;
- iv. mengadakan program publisiti melalui media elektronik (radio dan televisyen). Pada tahun 2018, sehingga September sebanyak 31 program publisiti telah dijalankan manakala pada tahun 2017 sebanyak 35 program telah diadakan.

- v. mengadakan program publisiti melalui media sosial seperti di laman sesawang, *Facebook*, *You Tube*, *WhatsApp* dan Instagram;
- vi. mengedarkan *pamphlet*, brosur, *flyers*, poster; dan
- vii. menjalankan program pendidikan seperti Program Seranta dan Program Bersama Pemimpin Masyarakat yang diadakan di seluruh negara melibatkan majikan dan pekerja. Pada tahun 2018, sehingga September sebanyak 80 program telah dijalankan manakala pada tahun 2017 sebanyak 190 program tersebut telah diadakan.

**PEMBERITAHUAN PERTANYAAN
DEWAN RAKYAT, MALAYSIA**

PERTANYAAN : LISAN

**DARIPADA : DATUK ZAKARIA BIN MOHD. EDRIS @
TUBAU [LIBARAN]**

TARIKH : 29.10.2018 (ISNIN)

**Datuk Zakaria bin Mohd. Edris @ Tubau [Libaran] minta MENTERI
PERDAGANGAN DALAM NEGERI DAN HAL EHWAL PENGGUNA**
menyatakan langkah-langkah diambil bagi menyeragamkan dan
menyeimbangkan kadar harga keperluan harian di Semenanjung, Sabah
dan Sarawak, dan apakah pandangan Kementerian mengenai isu dasar
kabotaj.

JAWAPAN:

Tuan Yang Di-Pertua,

Perbezaan harga barangan di Semenanjung, Sabah dan Sarawak adalah disebabkan oleh **kos pengangkutan yang tinggi** kerana jarak yang jauh ke kawasan terpencil, faktor kemudahan infrastruktur perhubungan yang kurang baik dan bentuk muka bumi.

Menyedari hakikat ini, Kerajaan telah melaksanakan Program Penyeragaman Harga dan Program 1Malaysia 1Harga (1M1H) sebagai usaha untuk membantu penduduk di Sabah dan Sarawak mendapatkan barangan keperluan asas pada harga yang sama seperti di Semenanjung.

Melalui Program Penyeragaman Harga yang telah dilaksanakan sejak dari tahun 2009, Kerajaan menanggung kos penghantaran barang-barang keperluan asas seperti beras, tepung gandum, minyak masak paket 1kg, gula pasir, gas petroleum cecair (gas memasak), petrol RON95 dan diesel ke kawasan pedalaman di Sabah, Sarawak dan Semenanjung.

Di samping itu, Kerajaan turut melaksanakan Program 1Malaysia 1Harga. Kerajaan membuat bayaran insentif kepada pengilang/pengeluar tepung gandum, minyak masak dan gula supaya pengedar dan pemborong terlibat dapat membekalkan barang tersebut pada harga runcit sama seperti yang ditawarkan di Semenanjung.

Tuan Yang Di-Pertua,

Dasar kabotaj merupakan satu dasar di bawah Kementerian Pengangkutan yang menghadkan perkhidmatan pengangkutan barangan dan penumpang di perairan Malaysia dan Zon Ekonomi Eksklusif hanya kepada kapal-kapal pendaftaran Malaysia.

Sungguhpun begitu, kos perkapalan merupakan sebahagian daripada kos yang terlibat dalam pengangkutan kargo daripada pengeluar kepada pengguna yang memberi kesan terhadap harga akhir barangan yang dibayar pengguna.

SOALAN NO : 34

**MESYUARAT KEDUA, PENGGAL PERTAMA
PARLIMEN KEEMPAT BELAS
PEMBERITAHUAN PERTANYAAN
DEWAN RAKYAT MALAYSIA**

PERTANYAAN : LISAN

DARIPADA : YB DATO' SERI DR. EDMUND SANTHARA

KAWASAN : SEGAMAT

TARIKH : 29 OKTOBER 2018, ISNIN

SOALAN :

YB DATO' SERI DR. EDMUND SANTHARA minta **MENTERI KERJA RAYA** menyatakan apakah kedudukan sebenar Projek Bangunan Pentadbiran Persekutuan termasuk Ibu Pejabat Polis Daerah Segamat yang telah lama dirancang tetapi sehingga kini tidak dilaksanakan.

JAWAPAN :

Tuan Yang Di-Pertua,

Untuk makluman Ahli Yang Berhormat, Kementerian Kerja Raya (KKR) adalah bertanggungjawab mengawalselia kontrak Penswastaaan Perkhidmatan Pengurusan dan Penyenggaraan Bangunan Gunasama Kerajaan Persekutuan (BGKP). Terdapat 67 BGKP di seluruh negara dan merupakan hak milik Jabatan Perdana Menteri yang ditadbir urus oleh Bahagian Pengurusan Hartanah (BPH), Pejabat Setiausaha Persekutuan (SUP) Sarawak dan Pejabat Setiausaha Persekutuan (SUP) Sabah. Di Segamat, tidak terdapat BGKP, tetapi di Johor terdapat 4 BGKP iaitu di Kluang, Batu Pahat, Johor Bahru dan Kompleks Sultan Abu Bakar, Gelang Patah.

Berkenaan cadangan dan perancangan Projek Bangunan Pentadbiran Persekutuan termasuk Ibu Pejabat Polis Daerah Segamat, ianya di luar bidang kuasa Kementerian Kerja Raya. Cadangan projek ini perlu dirujuk kepada Jabatan Perdana Menteri, manakala untuk Ibu Pejabat Polis Daerah Segamat perlu dirujuk kepada Kementerian Dalam Negeri.

Sekian, terima kasih.

SOALAN NO : 35

**MESYUARAT KEDUA, PENGGAL PERTAMA
PARLIMEN KEEMPAT BELAS
PEMBERITAHUAN PERTANYAAN
DEWAN RAKYAT MALAYSIA**

PERTANYAAN : LISAN

DARIPADA : YB DATO' SERI TIONG KING SING

KAWASAN : BINTULU

TARIKH : 29 OKTOBER 2018, ISNIN

SOALAN :

YB DATO' SERI TIONG KING SING minta **MENTERI KERJA RAYA** menyatakan:

(a) berapakah jumlah peruntukan yang disalurkan kepada pihak berkuasa tempatan untuk menaik taraf serta penyelenggaraan jalan raya dan jalan perhubungan desa terutamanya di kawasan luar bandar seperti dalam kawasan Parlimen Bintulu; dan

(b) bagaimanakah pihak Kementerian dapat memastikan bahawa setiap perunding teknikal yang dilantik oleh Kementerian dapat memenuhi piawaian dan justifikasi yang ditetapkan oleh Kementerian dalam memastikan mutu kerja yang berkualiti dan efektif.

JAWAPAN :

Tuan Yang Di-Pertua,

Untuk makluman Ahli Yang Berhormat,

(a) Bidang kuasa Kementerian Kerja Raya hanya melibatkan Jalan Persekutuan dan tiada sebarang peruntukan disalurkan kepada pihak berkuasa tempatan untuk menaik taraf serta penyelenggaraan jalan raya dan jalan perhubungan desa terutamanya di kawasan luar bandar.

(b) Untuk makluman Ahli Yang Berhormat, sekiranya melibatkan naiktaraf Jalan Persekutuan yang di bawah bidang kuasa Kementerian Kerja Raya, penetapan pelantikan perunding adalah tertakluk kepada kaedah perolehan terutamanya kaedah perolehan perkhidmatan perunding yang telah dikeluarkan oleh Kementerian Kewangan seperti berikut:

i) PK 3.1 - Perolehan Perkhidmatan Perunding;

ii) PK 3.2 - Manual Perolehan Perkhidmatan Perunding Edisi 2011 (Pindaan Kedua); dan

iii) PK 3.3 - Pentadbiran Kontrak Dan Format Perjanjian Piawai

Bagi memastikan perunding yang dilantik memenuhi piawaian dan justifikasi yang telah ditetapkan, Kementerian sentiasa mematuhi kaedah perolehan serta garis panduan yang telah ditetapkan dalam pemilihan sesuatu perunding.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL PERTAMA,
PARLIMEN KEEMPAT BELAS**

PERTANYAAN : LISAN

**DARIPADA : YB DATO' DR. NORAINI AHMAD
[PARIT SULONG]**

TARIKH : 29 OKTOBER 2018 (ISNIN)

SOALAN NO. 36

Minta **MENTERI HAL EHWAL EKONOMI** menyatakan apakah langkah dan dasar yang akan dilaksanakan serta diperkenalkan dalam usaha Kerajaan untuk menumpukan agenda 'memperkayakan rakyat' menerusi lebih banyak peluang pekerjaan dan perniagaan kepada rakyat di negara ini.

JAWAPAN

Yang di-Pertua,

Untuk makluman Ahli Yang Berhormat, dalam usaha untuk mewujudkan lebih banyak peluang pekerjaan dan peniagaan kepada rakyat, Kerajaan menerusi inisiatif di bawah Rancangan Malaysia Kesebelas (RMKe-11) 2016 hingga 2020, telah mengunjurkan pewujudan sebanyak 1.5 juta pekerjaan baharu menjelang tahun 2020. Selaras dengan hasrat untuk mencapai status negara maju, komposisi pekerjaan berkemahiran tinggi dianggarkan mencecah 35% daripada keseluruhan guna tenaga. Dalam hal ini, Kerajaan berusaha untuk mewujudkan lebih banyak peluang pekerjaan berkemahiran tinggi dengan menggalakkan industri untuk beralih kepada rantai nilai yang lebih tinggi yang memerlukan lebih ramai pekerja mahir.

Bagi mencapai hasrat ini, Kerajaan juga akan lebih selektif dalam menarik pelaburan dengan memberi keutamaan kepada aktiviti berintensifkan pengetahuan dan inovasi. Usaha akan dilaksanakan untuk menggalakkan inovasi, automasi dan mekanisasi, penggunaan Sistem Binaan Berindustri (IBS) dan menerima pakai teknologi baharu untuk menjana peluang pekerjaan berkemahiran dengan gaji dan upah yang lebih tinggi. Dalam hal ini, pelaburan berkualiti tinggi akan diberi keutamaan untuk mewujudkan lebih banyak pekerjaan berkemahiran dalam ekonomi melalui kajian semula senarai industri yang layak mendapat insentif di bawah Akta Penggalakan Pelaburan 1986.

Yang di-Pertua,

Bagi memastikan rakyat negara ini dapat mengisi peluang pekerjaan yang diwujudkan, beberapa langkah akan diambil bagi meningkatkan kualiti modal insan negara. Antara langkah yang dilaksanakan oleh Kerajaan adalah seperti berikut:

- i) Pertama, menambah baik kecekapan pasaran buruh melalui usaha meminimumkan ketidakpadanan dalam pasaran buruh dan mengenal pasti jurang kemahiran kritikal bagi perancangan modal insan masa hadapan;
- ii) Kedua, pekerja yang kehilangan pekerjaan akan dibantu dalam proses carian pekerjaan, penempatan dan latihan melalui program Dasar Pasaran Buruh Aktif. Latihan *reskilling* dan *upskilling* juga akan disediakan untuk membantu pekerja yang kehilangan pekerjaan bagi meningkatkan kemahiran mengikut keperluan industri;
- iii) Ketiga, mempergiat kolaborasi dengan pihak industri untuk menambah baik kualiti program di institusi TVET dan institusi pengajian tinggi; dan
- iv) Keempat, memperkukuh pembelajaran sepanjang hayat untuk peningkatan kemahiran bagi membolehkan penganggur belia mendapat latihan semula dan kemahiran secara berterusan untuk memenuhi permintaan pasaran buruh.

Untuk makluman Ahli Yang Berhormat juga, dari segi pewujudan peluang perniagaan, pelbagai program dan inisiatif akan dilaksanakan untuk menambah baik iklim perniagaan. Pendekatan yang lebih menyeluruh, tersusun dan strategik untuk mereformasi tadbir urus akan terus dilaksanakan bagi mengurangkan kos kawal selia dan mempertingkatkan daya saing perniagaan.

Sementara itu, pelaksanaan kawal selia dan amalan perdagangan yang sesuai akan memudahkan cara urusan menjalankan perniagaan dan mengurangkan kos perniagaan yang akhirnya akan memperkayakan rakyat. Sehubungan itu, Amalan Baik Peraturan (GRP) akan terus dipergiat untuk menambah baik proses dan prosedur bagi meningkatkan produktiviti dan daya saing. Di samping itu, amalan perdagangan

termasuk peraturan bukan tarif (NTM) akan diperkemas untuk memudahkan cara perdagangan.

Selain itu, usaha untuk mewujudkan perusahaan kecil dan sederhana (PKS) yang berdaya tahan dan mampan akan terus dilaksanakan bagi melonjakkan pertumbuhan PKS merentasi semua sektor. Sehubungan itu, pelaksanaan 32 inisiatif termasuk enam Program Berimpak Tinggi di bawah Pelan Induk PKS, 2012-2020 akan dipergiat untuk membangunkan PKS yang berdaya tahan dan mampan. Usaha akan diperkukuh untuk meningkatkan produktiviti, memperkasa modal insan, memperbanyak penerimgunaan teknologi dan inovasi, dan mempermudah urusan menjalankan perniagaan serta menambah baik akses kepada pembiayaan.

Dalam hal ini, pelbagai program dan inisiatif akan terus dilaksanakan bagi menyokong pembangunan PKS. Program pembinaan kapasiti dan keupayaan serta geran dan pinjaman mudah disediakan oleh Kerajaan dan institusi kewangan bagi membantu PKS sama ada pada peringkat permulaan, mikro ataupun sederhana. Sebagai contoh, program Skim Peningkatan Kapasiti dan Keupayaan PKS membantu PKS untuk membina kapasiti dan keupayaan melalui pelaburan modal dan penerimgunaan teknologi yang lebih baik. Manakala, program Pembangunan Usahawan Mikro pula akan menggalakkan pertumbuhan dan produktiviti perusahaan mikro dengan menyediakan sokongan yang diperlukan dalam menubuhkan perniagaan.

Selain itu, Kerajaan akan turut menumpukan usaha untuk meningkatkan bilangan pengeksport dan meneroka pasaran baharu. Dalam hal ini, program akan dijalankan untuk meningkatkan ketersediaan eksport PKS dan menambah baik pematuhan kepada pasaran antarabangsa. Langkah untuk meningkatkan pengantarabangsaan firma Malaysia, terutama PKS akan dilaksanakan melalui pelbagai inisiatif termasuk memperluas skop dana eksport perkhidmatan untuk merangkumi industri halal serta menyediakan lebih banyak insentif kepada pengeksport melalui Skim Jaminan Sektor Perkhidmatan. Program Promosi Eksport pula akan diperluas untuk merangkumi aktiviti

penyertaan pasaran akan terus membantu PKS menembusi pasaran eksport baharu.

Seterusnya, langkah memodenkan pelesenan perniagaan, menghapuskan beban kawal selia perniagaan yang tidak perlu dan mengurangkan proses birokrasi juga akan terus dijalankan bagi menurunkan kos pematuhan. Di samping itu, NTM di pintu masuk kastam akan diperkemas untuk memansuhkan amalan perdagangan yang tidak perlu dan memperbaiki aliran import dan eksport serta mengurangkan kos menjalankan perniagaan bagi pengimport, pengeksport dan pemain logistik.

Sekian, terima kasih.
29 Oktober 2018

Kementerian Hal Ehwal Ekonomi

SOALAN NO : 37

**MESYUARAT KEDUA, PENGGAL PERTAMA
PARLIMEN KEEMPAT BELAS
PEMBERITAHUAN PERTANYAAN
DEWAN RAKYAT MALAYSIA**

PERTANYAAN : LISAN

DARIPADA : YB DR. HASAN BIN BAHROM

KAWASAN : TAMPIN

TARIKH : 29 OKTOBER 2018, ISNIN

SOALAN :

YB DR. HASAN BIN BAHROM minta **MENTERI KERJA RAYA** menyatakan tentang status pembinaan jalan raya yang menghubungkan antara Felda Bukit Jalor dengan kawasan Pekan Gemas.

JAWAPAN :

Tuan Yang Di-Pertua,

Untuk makluman Ahli Yang Berhormat, projek membina jalan baru dari Felda Bukit Jalor ke Pekan Gemas melalui NFC (National Feedlot Centre) adalah di bawah bidang kuasa Kementerian Pembangunan Luar Bandar (KLPB). Untuk makluman Ahli Yang Berhormat jua, Kementerian ini dimaklumkan bahawa projek tersebut telah dimohon untuk pelaksanaan di bawah Rancangan Malaysia Ke-11 (Rolling Plan ke-4). Walau bagaimanapun, pelaksanaan projek tersebut adalah tertakluk kepada kelulusan agensi pusat.

Sekian, terima kasih.

PEMBERITAHUAN PERTANYAAN DEWAN RAKYAT

PERTANYAAN : LISAN
DARIPADA : TUAN STEVEN CHOONG SHIAU YOON
[TEBRAU]
TARIKH : 29 OKTOBER 2018 (ISNIN)
SOALAN :

YB TUAN STEVEN CHOONG SHIAU YOON [TEBRAU] minta **MENTERI DI JABATAN PERDANA MENTERI** menyatakan sejauh manakah usaha Kementerian bagi merombak Jabatan Kemajuan Orang Asli (JAKOA) agar Orang Asal diberi keupayaan untuk memperbaiki kehidupan mereka serta langkah-langkah efektif bagi membela hak komuniti Orang Asal seperti yang terkandung dalam manifesto Pakatan Harapan.

JAWAPAN: YB SENATOR WAYTHA MOORTHY,
MENTERI DI JABATAN PERDANA MENTERI

Tuan Yang di-Pertua,

Untuk makluman Yang Berhormat, usaha merombak JAKOA telah pun dimulakan inisiatifnya melalui percambahan fikiran berdasarkan Manifesto Kerajaan yang telah dilaksanakan oleh JAKOA bersama wakil-wakil masyarakat Orang Asli dan juga wakil-wakil NGO Orang Asli. Meskipun demikian, tindakan untuk merombak JAKOA adalah tertakluk kepada dasar perjawatan semasa, iaitu hendaklah dilaksanakan tanpa melibatkan implikasi kewangan kepada Kerajaan.

Untuk makluman Yang Berhormat jua, Kerajaan melalui JAKOA telah melaksanakan pelbagai program bagi memastikan hak masyarakat Orang Asli terus terpelihara seperti digariskan dalam Pelan Strategik JAKOA 2016 -2020 yang menfokuskan 7 Teras Utama iaitu Pentadbiran Tanah, Kemudahan Prasarana, Modal Insan dan Kemahiran Belia, Ekonomi Mampan, Seni Budaya dan Warisan, Jaringan Keselamatan Sosial dan Sistem Penyampaian Perkhidmatan kepada masyarakat Orang Asli.

Sejajar dengan Manifesto Janji 38, JAKOA mensasarkan untuk menambahbaik pentadbiran tanah Orang Asli melalui program penandaan kawasan penempatan Orang Asli, penubuhan Jawatankuasa kerja berkaitan hak tanah Orang Asli, mewujudkan garis panduan melalui penglibatan Orang Asli dan pemantauan status permohonan tanah Orang Asli. Dalam memastikan 4 program tersebut berjaya dilaksana, pemerkasaan dasar, kakitangan dan tatacara kerja perlu diperhalusi terlebih dahulu.

Bagi mengukuhkan pentadbiran tanah Orang Asli, penstrukturan semula organisasi melibatkan bahagian atau unit dan jawatan-jawatan yang diperlukan akan diusulkan agar pentadbiran tanah Orang Asli dapat berfungsi dengan efisien dan cekap. Usaha bagi menyelaraskan tindakan JAKOA dan Pejabat Tanah akan dipertingkatkan untuk membina kerjasama yang erat.

Untuk makluman Yang Berhormat, Kerajaan juga bercadang untuk membuat pindaan terhadap Akta Orang Asli 1954 (Akta 134) semakan 1974. Cadangan pindaan ini bertujuan untuk menambah baik peruntukan sedia ada bagi menjaga kepentingan dan kebajikan masyarakat Orang Asli sejajar dengan keperluan semasa. Antara perkara yang menjadi keutamaan dalam pindaan tersebut adalah perkara berkaitan tanah adat Orang Asli.

JAKOA turut menekankan mengenai kepentingan pewartaan tanah Orang Asli. Bagi tahun 2018, JAKOA telah diperuntukan RM1.5 Juta bagi kerja-kerja ukur. Sehubungan dengan itu, JAKOA merancang untuk melaksanakan kerja-kerja ukur halus perkampungan Orang Asli yang telah lulus Majlis Mesyuarat Kerajaan (MMK).

PEMBERITAHUAN PERTANYAAN
MESYUARAT KEDUA, PENGGAL PERTAMA
PARLIMEN KEEMPAT BELAS (2018)
DEWAN RAKYAT

PERTANYAAN : LISAN

DARIPADA : YB DATUK ZAHIDI BIN ZAINUL ABIDIN
[PADANG BESAR]

TARIKH : 29 OKTOBER 2018 (ISNIN)

SOALAN:

Datuk Zahidi bin Zainul Abidin [Padang Besar] minta **PERDANA MENTERI** menyatakan berapakah jumlah sekolah tahfiz yang berdaftar dengan Kementerian dan apakah perancangan Kementerian dalam memperkasakan pendidikan sekolah tahfiz.

JAWAPAN : **(YB DATUK SERI DR MUJAHID YUSOF,**
MENTERI DI JABATAN PERDANA MENTERI)

Tuan Yang di-Pertua,

Sebagaimana Ahli Yang Berhormat sedia maklum, semua institusi pendidikan agama termasuk sekolah tahfiz yang ditubuhkan oleh pelbagai pihak adalah perlu berdaftar dan tertakluk kepada Enakmen Kawalan Sekolah-Sekolah Agama atau undang-undang dan peraturan yang sedang berkuatkuasa di negeri berkenaan. Ini adalah selaras dengan ketetapan

Butiran 1, Senarai Negeri, Jadual Kesembilan, Perlembagaan Persekutuan bahawa hal ehwal Islam adalah di bawah bidang kuasa pihak berkuasa agama negeri. Oleh itu, usaha untuk membantu dan memperkasa institusi tersebut adalah di bawah pihak berkuasa agama negeri dan pihak pengurusan institusi berkenaan.

Walau bagaimanapun, bagi tujuan penyelarasan maklumat statistik institusi pendidikan Islam yang berdaftar, Kerajaan Persekutuan telah mewujudkan Sistem Maklumat Pendidikan Islam (SIMPENI) dengan kerjasama pihak berkuasa agama negeri-negeri. Sehingga Jun 2018 terdapat sebanyak 815 buah sekolah tahfiz berdaftar dengan pihak berkuasa agama negeri.

Di samping itu, Kerajaan juga telah berusaha memperkasa pendidikan tahfiz dengan memperkenalkan Dasar Pendidikan Tahfiz Negara (DPTN) yang merupakan dokumen penting sebagai landasan jangka panjang bagi mewujudkan pendidikan tahfiz berkualiti seterusnya melahirkan modal insan dan generasi al-Quran dengan memberi penekanan kepada teras-teras berikut :

- i. memantapkan undang-undang dan penguatkuasaan;
- ii. memperkenalkan model institusi tahfiz yang diiktiraf;
- iii. memantapkan kurikulum pendidikan tahfiz yang sesuai dengan pendidikan arus perdana;
- iv. memperkasa tadbir urus institusi tahfiz;
- v. mewujudkan sistem pengiktirafan dan pensijilan bagi institusi tahfiz;

Pada masa ini semua negeri telah menerima pemakluman Dasar Pendidikan Tahfiz Negara (DPTN). DPTN juga telah dipersetujui oleh Majlis Kebangsaan Hal Ehwal Ugama Islam (MKI) Kali ke-61 yang telah bersidang pada 28 Jun 2016. Mesyuarat Majlis Raja-Raja juga memberikan perkenan kepada DPTN pada Mesyuarat Majlis Raja-Raja kali ke 247 pada 11 Oktober 2017. Kerajaan negeri berperanan untuk menerima pakai dasar tersebut seterusnya melaksanakan pelan tindakan yang telah digariskan. Peranan besar oleh kerajaan negeri adalah untuk menjayakan Dasar Pendidikan Tahfiz Negara ini di negeri-negeri.

Selain itu, Kerajaan juga telah mencadangkan pindaan kepada Akta Pentadbiran Undang-Undang Islam (Wilayah-Wilayah Persekutuan) 1993 ["Akta 505"] dalam peruntukan berkaitan dengan sekolah agama Islam bagi melancarkan lagi urusan pendaftaran, pentadbiran dan pengawalseliaan sekolah-sekolah agama Islam yang termasuk sekolah tahfiz.

Dalam cadangan pindaan Akta 505 tersebut juga, Kerajaan akan mengkaji dan meneliti peruntukan-peruntukan yang boleh memberi kuasa kepada Majlis untuk menggubal kaedah-kaedah yang berkaitan dengan sekolah-sekolah agama Islam termasuk peruntukan-peruntukan yang berkaitan dengan kesalahan dan penalti terhadap mana-mana pelanggaran kepada kaedah-kaedah tersebut dan undang-undang sedia ada.

Sekian, terima kasih.

PEMBERITAHUAN PERTANYAAN BAGI JAWAPAN LISAN

MESYUARAT KEDUA, DEWAN RAKYAT

PENGGAL PERTAMA, PARLIMEN KEEMPAT BELAS

MAJLIS MESYUARAT DEWAN RAKYAT

PERTANYAAN : JAWAB LISAN

DARIPADA : DATUK SERI IR. DR. WEE KA SIONG

[AYER HITAM]

TARIKH : 29 OKTOBER 2018 (ISNIN)

SOALAN :

Datuk Seri Ir. Dr. Wee Ka Siong [Ayer Hitam] minta MENTERI

PEMBANGUNAN WANITA, KELUARGA DAN MASYARAKAT

menyatakan :-

(a) Adakah penguatkuasaan ke atas prosedur operasi piawaian (SOP)

perkahwinan bawah umur akan lebih tegas dengan mewajibkan

rekod penulisan oleh "*judicial opinion*" atau Ketua Menteri yang

meluluskan suatu kes perkahwinan bawah umur; dan

(b) Apakah status semakan semula oleh Kerajaan bagi

memperkemaskan SOP perkahwinan bawah umur yang sedia ada.

JAWAPAN: YAB DATO' SERI DR. WAN AZIZAH DR. WAN ISMAIL,
TIMBALAN PERDANA MENTERI MERANGKAP
MENTERI PEMBANGUNAN WANITA, KELUARGA DAN
MASYARAKAT

Tuan Yang di-Pertua,

Prosedur berhubung kebenaran perkahwinan bawah umur ditadbir di bawah beberapa agensi kerajaan dan bukannya di bawah Kementerian Pembangunan Wanita, Keluarga dan Masyarakat.

Bagi permohonan kebenaran perkahwinan bawah umur orang Islam, Jabatan Kehakiman Syariah Malaysia (JKSM) telah mewujudkan Prosedur Operasi Standard (SOP) Permohonan Kebenaran Nikah Bawah Umur sebagai panduan kepada Mahkamah Syariah seluruh Malaysia. SOP tersebut telah menetapkan proses kerja dan tatacara tertentu bermula daripada memfailkan kes permohonan kebenaran nikah di bawah umur di mahkamah Syariah, penyampaian dokumen, pendengaran kes sehingga kes tersebut diputuskan. Berhubung mewajibkan rekod penulisan "*judicial opinion*", SOP tersebut meliputi bentuk keterangan-keterangan yang perlu diambil oleh Hakim Syarie dan dikemukakan oleh pihak-pihak yang terlibat dan juga saksi-saksi yang

berkaitan. Keterangan-keterangan tersebut hendaklah dicatat oleh Hakim Syarie sebagai sebahagian daripada nota prosiding.

Sebagai langkah penguatkuasaan yang lebih tegas terhadap proses permohonan perkahwinan bawah umur, Jabatan Kemajuan Islam Malaysia (JAKIM) sedang menjalankan kajian untuk meminda Akta Undang-undang Keluarga Islam (Wilayah-Wilayah Persekutuan) 1984 secara holistik termasuk penggubalan satu tatacara khas bagi permohonan untuk kebenaran berkahwin di bawah had umur dalam bentuk undang-undang subsidiari (kaedah-kaedah). SOP yang telah dikeluarkan oleh JKSM akan turut dirujuk untuk tujuan tersebut.

Tuan Yang di-Pertua,

Bagi permohonan kebenaran perkahwinan bawah umur orang bukan Islam di bawah Akta Membaharui Undang-Undang (Perkahwinan dan Perceraian) 1976 pula, ia tertakluk kepada kebenaran Ketua Menteri dan prosedur ini ditadbir oleh Jabatan Pendaftaran Negara (JPN), Kementerian Dalam Negeri.

Mesyuarat Bagi Membincangkan Cadangan Pindaan Had Umur Perkahwinan dalam Perundangan pada 13 September 2018 yang

dipengerusikan oleh YAB Timbalan Perdana Menteri telah memutuskan supaya satu Memorandum Jemaah Menteri mengenai cadangan pindaan had umur minimum perkahwinan bagi orang bukan Islam perlu dibentangkan dalam Mesyuarat Jemaah Menteri. Pindaan ini hendaklah termasuk SOP Perkahwinan Bawah Umur sebagai sebahagian daripada Akta Membaharui Undang-Undang (Perkahwinan dan Perceraian) 1976. Pihak Kementerian Dalam Negeri sedang menerajui usaha ini.

Manakala bagi perkahwinan adat di Sabah dan Sarawak serta Orang Asli, libat urus perlu diadakan dengan pemegang taruh berkaitan di peringkat agensi Kerajaan dan Bukan Kerajaan serta negeri-negeri berkaitan bagi memastikan penyelarasan antara proses kerja dan tatacara yang diamalkan. Sesi libat urus ini akan turut menekankan penetapan had umur minimum perkahwinan dalam semua perundangan perkahwinan di Malaysia, yang mana merupakan prioriti utama Kerajaan pada masa ini.

Tuan Yang di-Pertua,

Kementerian berbesar hati dan menghargai maklum balas positif semasa pembentangan dalam Mesyuarat *Pre-Council* Majlis Raja-Raja dan Mesyuarat Menteri Besar dan Ketua Menteri yang mana kedua-duanya berlangsung pada 16 Oktober 2018. Kedua-dua mesyuarat ini pada

prinsipnya menyambut baik cadangan Kerajaan untuk menaikkan had umur minimum perkahwinan kepada 18 tahun untuk lelaki dan perempuan. Mesyuarat Majlis Raja-Raja pada 17 Oktober 2018 juga telah mengambil maklum akan cadangan ini. Adalah diharapkan maklum balas yang positif ini dapat memacu ke arah proses rundingan yang lancar dalam menetapkan had umur minimum perkahwinan kepada 18 tahun.

PARLIMEN MALAYSIA
PEMBERITAHU PERTANYAAN DEWAN RAKYAT

PERTANYAAN : Lisan

DARIPADA : Datuk Haji Shabudin bin Yahaya [
Tasek
Gelugor]

TARIKH : 29 Oktober 2018 (Isnin)

SOALAN : Datuk Haji Shabudin bin Yahaya
[Tasek Gelugor] MENTERI
PERTANIAN DAN INDUSTRI
ASAS TANI menyatakan apakah
perancangan yang telah dirangka
dan dilaksanakan oleh Kementerian
untuk memodenkan aktiviti
pertanian bagi menghadapi
Revolusi Industri 4.0.

JAWAPAN

Tuan Yang Dipertua,

Perancangan yang telah dirangka dan sedang dilaksanakan oleh Kementerian melalui Jabatan Pertanian untuk memodenkan aktiviti pertanian bagi menghadapi Revolusi Industri 4.0 seperti berikut :

- i. Mengaplikasikan teknologi dan mekanisasi dalam aktiviti penanaman, misalnya penggunaan dron bagi tujuan penyemburan racun perosak, pembajaan dan pemantauan kesuburan tanaman dari serangan penyakit dan perosak bagi mengelakkan kehilangan hasil dan mengekalkan potensi hasil;
- ii. Membangunkan sistem aplikasi maklumat geospasial bagi subsektor tanaman seperti MakGeo Padi di kawasan jelapangan. Sistem ini bertindak sebagai pusat maklumat (*one stop center*) sehenti berteraskan imej satelit yang menggabungkan teknologi *Remote Sensing*, ICT dan sistem maklumat geografi (GIS) bagi membolehkan jabatan mengurus dan memantau tanaman dengan tepat, menyeluruh dan sistematik. Maklumat dalam aplikasi ini sedang diperluaskan

kepada tanaman padi di luar jelapang, sayur-sayuran dan buah-buahan; dan

- iii. Mentransformasi dan mengorientasikan pembangunan pertanian secara mampan bagi meningkatkan produktiviti dan daya tahan (adaptasi) mengikut perubahan cuaca. Pendekatan *Climate-Smart Agriculture* akan dilaksanakan seperti penanaman menggunakan sistem fertigasi, penanaman di bawah Struktur Pelindung Hujan dan penanaman secara persekitaran terkawal seperti *plant factory*.

Selain daripada itu, dalam meningkatkan penyampaian perkhidmatan kepada pelanggan dan meningkatkan tahap kecekapan tugas, Jabatan Pertanian telah membangunkan sebanyak 13 perkhidmatan secara online iaitu MyPhyto & E-Cert, e-Permit, Permit CITES, MyPesticide, Mi-Trace, PLASM, AgrisGeoPortal, myGAP, E-Maklumbalas, E-Integriti, Sistem PEQ dan eHarvest. Terdapat 2 lagi yang masih dalam tindakan iaitu GeoTanih dan Geoinformasi Tanaman.

Bagi sub-sektor ternakan, Kementerian melalui Jabatan Perkhidmatan Veterinar telah melaksanakan pembangunan Sistem Daya Jejak (*Traceability*) bagi menghadapi Revolusi Industri 4.0. Antara yang dilaksanakan termasuklah:

- i. program pemetaan lokasi ladang-ladang ternakan menggunakan aplikasi *Veterinary Online Map* (VENOM);
- ii. penggunaan Radio-Frequency Identification (RFID) dalam sistem identifikasi premis walit dan sistem *traceability* produk sarang burung walit (Edible Birdnest, EBN); dan
- iii. sistem *e-permit* untuk permohonan pemindahan import dan eksport, ternakan dan produk ternakan.

Di samping itu, perubahan kaedah penternakan bagi memberi penekanan kepada penggunaan teknologi yang mapan seperti reban atau kandang tertutup bagi penternakan unggas dan lembu tenusu juga telah diperkenalkan. Manakala, penternakan babi secara moden (*Modern Pig Farming* - MPF) menggunakan konsep kandang tertutup, tiada bahan kumbahan keluar dari ladang (*zero discharge*) dan mewujudkan zon penampungan di antara ladang dan perumahan.

Sementara itu, bagi memodenkan industri perikanan di Malaysia, Kementerian melalui Jabatan Perikanan Malaysia telah merangka program-program seperti berikut:

- i. Program pemodenan vesel penangkapan ikan selaras dengan *International Maritime Organization* (IMO), *International Conventions* dan *International Association of Classification Societies* (IACS) serta keperluan untuk mematuhi *Hygiene on Board / Fish Quality Certification*, Sijil Layak Layar dan diinsuranskan;
- ii. Penggunaan teknologi bagi aktiviti penangkapan ikan dan pengawasan vesel seperti sistem penentuan kawasan berpotensi (FSI), *juvenil and trash excluder device* (JTED) dan pemasangan alat *automatic identification system* (AIS) atau *vessel monitoring system* (VMS); dan
- iii. Penyelidikan dan pembangunan (R&D) dalam pengeluaran akuakultur meliputi pembangunan baka dan peningkatan kualiti benih.

**PEMBERITAHUAN PERTANYAAN
DEWAN RAKYAT, MALAYSIA**

PERTANYAAN : LISAN

DARIPADA : TUAN ANYI NGAU [BARAM]

TARIKH : 29.10.2018 (ISNIN)

Tuan Anyi Ngau [Baram] minta MENTERI PERDAGANGAN DALAM NEGERI DAN HAL EHWAL PENGGUNA menyatakan sama ada pihak Kementerian akan meneruskan subsidi pengangkutan untuk bahan api di kawasan pedalaman Sarawak. Nyatakan sama ada amalan pengangkutan yang melibatkan kontraktor utama adalah SOP yang berkesan.

JAWAPAN:

Tuan Yang Di-Pertua,

Kerajaan Persekutuan meneruskan subsidi pengangkutan bahan api iaitu petrol RON95 dan diesel ke pedalaman Sarawak pada tahun 2018 melalui Program Penyeragaman Harga.

Bagi melaksanakan Program ini, Kerajaan memilih dan melantik transporter untuk menghantar barang keperluan daripada pembekal sehingga ke *Point of Sales* (POS) di kawasan pengedaran.

Kaedah penghantaran bekalan melalui *transporter* ini merupakan kaedah yang terbaik memandangkan *transporter* yang dilantik adalah dari kalangan Syarikat tempatan yang mahir dengan selok belok kawasan pengedaran di pedalaman.

PEMBERITAHUAN PERTANYAAN MESYUARAT KEDUA,
PENGGAL PERTAMA, PARLIMEN KEEMPAT BELAS,
MAJLIS MESYUARAT DEWAN RAKYAT

PERTANYAAN : LISAN

DARIPADA : DATO' SERI DR. SHAHIDAN BIN
KASSIM
(ARAU)

TARIKH : 29 OKT 2018
(ISNIN)

SOALAN:

Minta **MENTERI PERTAHANAN** menyatakan kenapa ditarik balik pasukan tentera kita dari misi keamanan di Arab Saudi dan alasan penutupan Pusat Anti Keganasan King Salman Centre di Putrajaya. Adakah kita tunduk kepada desakan negara Iran atau negara-negara lain.

JAWAPAN:

Tuan Yang di-Pertua,

Dasar luar Malaysia ialah berkecuali atau *non-alignment* dan tidak campur tangan atau *non-interference* dengan urusan dalaman negara lain. Penglibatan ATM di luar negara hanyalah di bawah payung Pertubuhan Bangsa-Bangsa Bersatu (PBB) melalui misi pengaman atau sebagai pemerhati. Oleh yang demikian, kerajaan telah memutuskan untuk memanggil pulang pasukan ATM daripada Arab Saudi kerana ianya bertentangan dengan dasar luar Malaysia.

Bagi isu King Salman Center for International Peace (KSCIP) pula, penubuhannya telah dipersetujui semasa lawatan Negara Raja Salman bin Abdul Aziz Al-Saud, Raja Arab Saudi ke Malaysia pada 26 Februari hingga 1 Mac 2017 yang lalu. Kerajaan Arab Saudi telah bersetuju membiayai kos operasi selama 2 tahun dan kos pembinaan premis serta infrastruktur KSCIP. Manakala Kerajaan Malaysia menyediakan tanah bagi tujuan pembinaan premis dan infrastruktur berkenaan. Memandangkan perasmian KSCIP masih tertangguh sehingga kini, maka tiada peruntukan disalurkan oleh Kerajaan Arab Saudi. Jemaah Menteri pada mesyuarat 18 Julai 2018 telah

bersetujui supaya operasi KSCIP ditamatkan dengan mengambil kira antara lain faktor kewangan kepada kerajaan.

Jemaah Menteri pada mesyuarat 3 Oktober 2018 juga, telah bersetuju supaya Kementerian Pendidikan mengkaji pengambalian fungsi KSCIP untuk diteruskan operasinya sebagai sebuah Pusat Kajian Keamanan.

Keputusan yang telah dibuat ini adalah tanpa sebarang tekanan daripada negara-negara luar.

PEMBERITAHUAN PERTANYAAN
MESYUARAT KEDUA, PENGGAL PERTAMA
PARLIMEN KEEMPAT BELAS (2018)
DEWAN RAKYAT

PERTANYAAN : LISAN

**DARIPADA : YB TUAN NIK MOHAMAD ABDUH BIN NIK
ABDUL AZIZ [BACHOK]**

TARIKH : 29 OKTOBER 2018 (ISNIN)

SOALAN :

Tuan Nik Mohamad Abduh bin Nik Abdul Aziz [Bachok] minta **PERDANA MENTERI** menyatakan apakah Kerajaan berhasrat meminda Akta Mahkamah Syariah (Bidang Kuasa Jenayah) 1965 bagi meningkatkan kuasa Mahkamah Syariah menjatuhkan hukuman terhadap pesalah jenayah syariah.

JAWAPAN : **(YB DATUK SERI DR MUJAHID YUSOF,
MENTERI DI JABATAN PERDANA MENTERI)**

Tuan Yang di-Pertua,

Kerajaan komited untuk memperkasakan mahkamah Syariah secara menyeluruh. Bagi pihak Kerajaan, aspek pemerkasaan Mahkamah Syariah tidak hanya dilihat dari sudut pindaan Akta 355 sahaja tetapi

termasuk perkara-perkara lain yang boleh meningkatkan tahap kecekapan tadbir urus Mahkamah Syariah, sistem penyampaian mahkamah Syariah dan perkara-perkara yang boleh mengukuhkan kedudukan Mahkamah Syariah serta kredibiliti pegawai mahkamah termasuklah Hakim Syarie, Pendakwa Syarie dan Peguam Syarie.

Dalam usaha untuk memperkasakan mahkamah Syariah tersebut, Kerajaan turut memberikan penekanan kepada kajian kepada undang-undang baharu yang berkaitan dengan mahkamah Syariah seperti undang-undang berkaitan profesion guaman syarie, semakan semula undang-undang sedia ada berkaitan mahkamah Syariah yang mana termasuklah Akta Mahkamah Syariah (Bidang Kuasa Jenayah) 1965 [Akta 355] dan undang-undang lain yang berkaitan dengannya seperti undang-undang kesalahan jenayah syariah, undang-undang tatacara mal mahkamah Syariah, undang-undang tatacara jenayah syariah, undang-undang keterangan mahkamah Syariah dan sebagainya.

Sekian, terima kasih.

PEMBERITAHUAN PERTANYAAN BAGI JAWAB LISAN
DEWAN RAKYAT MALAYSIA

PERTANYAAN : JAWAB LISAN

**DARIPADA : DATO' SERI HAJI ABDUL HADI BIN
AWANG
[MARANG]**

TARIKH : 29 OKTOBER 2018

SOALAN : Dato' Seri Haji Abdul Hadi bin Awang [Marang] minta MENTERI LUAR NEGERI menyatakan apakah Kerajaan berhasrat untuk merujuk Myanmar kepada Mahkamah Jenayah Antarabangsa supaya disiasat dan dipertanggungjawabkan atas jenayah hak asasi dan kemanusiaan yang dilakukan.

JAWAPAN

Tuan Yang di-Pertua,

Terima kasih saya ucapkan kepada YB Marang atas pertanyaan yang dikemukakan.

2. Malaysia mengambil pendirian berprinsip yang jelas dan konsisten mengenai isu penindasan etnik Rohingya. Malaysia bukan sahaja aktif membangkitkan isu ini di peringkat ASEAN, malah juga di peringkat OIC dan di Pertubuhan Bangsa-Bangsa Bersatu (PBB). Sejak berlakunya krisis kemanusiaan melibatkan etnik Rohingya, Malaysia terus menggesa Kerajaan Myanmar menghentikan penindasan dan kekejaman yang dilaporkan berlaku ke atas etnik Rohingya.

3. Menerusi satu kenyataan Menteri Luar Negeri bertarikh 29 Ogos 2018, Malaysia telah menuntut agar mereka yang bertanggungjawab ke atas pelanggaran hak asasi manusia etnik Rohingya di bawa ke muka pengadilan, termasuk melalui mekanisme kehakiman antarabangsa. Malaysia juga mengemukakan kebimbangannya ke atas hasil laporan yang dikemukakan oleh *United Nations Independent International Fact-Finding Mission* (FFM) berkenaan Myanmar, yang meneliti pelbagai bentuk kekejaman, penindasan dan diskriminasi yang dilakukan ke atas etnik Rohingya. Malaysia berpandangan bahawa ianya mempunyai persamaan dengan kes-kes genosid yang pernah berlaku sebelum ini. Dalam masa yang sama, Malaysia juga telah menzahirkan kekecewaannya kepada Kaunselor Negara Myanmar, Aung San Suu Kyi, melalui Utusan Khas beliau yang membuat lawatan ke Malaysia pada 5 September 2018.

Tuan Yang di-Pertua,

4. Saya ingin mengambil peluang ini untuk memaklumkan Dewan yang mulia ini bahawa hasil daripada usaha-usaha Malaysia, negara-negara anggota ASEAN kini mengambil pendekatan yang lebih kritis terhadap Kerajaan Myanmar. Sebagai contoh, pada mesyuarat Menteri-Menteri Luar ASEAN dengan Setiausaha Agong PBB di sela-sela Perhimpunan Agong UNGA ke-73, telah digariskan bahawa ASEAN tidak boleh menidakkan krisis yang melanda Negeri Rakhine. Oleh yang demikian, proses repatriasi pelarian Negeri Rakhine perlu dimulakan dengan segera. Pada masa ini, ASEAN masih terus menjalankan usaha-usaha penyaluran bantuan kemanusiaan untuk membantu pelarian Rohingya, termasuklah melalui *ASEAN Coordination Centre for Humanitarian Assistance* (AHA Centre).

5. Di peringkat PBB, Malaysia tidak teragak-agak untuk membangkitkan isu Rohingya. Contohnya di bawah kerangka Majlis Hak Asasi Manusia (HRC), PBB, Malaysia terlibat aktif dalam perbincangan berhubung isu Rohingya. Malaysia juga menyokong penuh (*co-sponsor*) resolusi PBB yang memberikan mandat kepada (dengan izin) *Independent, International Fact-Finding Mission (IFFM) on Myanmar* untuk membuat penyiasatan ke atas kes ini. Proses ini telah menghasilkan satu laporan komprehensif berkenaan pelanggaran hak asasi manusia melibatkan etnik Rohingya.

6. Pada Sesi HRC ke-39 yang diadakan di Geneva, Switzerland pada bulan September 2018, Malaysia telah berjaya, bersama-sama dengan negara-negara OIC dan Kesatuan Eropah, membawa satu resolusi berkenaan situasi hak asasi manusia etnik Rohingya dan lain-lain

minoriti di Myanmar. Hasilnya, satu mekanisme baru ditubuhkan di bawah HRC untuk mengumpul dan menganalisa bukti-bukti pelanggaran hak asasi manusia yang berlaku ke atas kumpulan minoriti termasuk etnik Rohingya di Myanmar. Tujuannya adalah untuk membantu proses pengadilan antarabangsa di masa akan datang.

7. Kerajaan terus meneliti langkah-langkah yang dikatakan diambil oleh Kerajaan Myanmar untuk menyiasat kes-kes pelanggaran hak asasi manusia yang dilaporkan. Walau bagaimanapun, sehingga kini, proses dalaman Myanmar untuk menegakkan kedaulatan undang-undangnya sendiri dilihat tidak berjaya mendapatkan keadilan yang sewajarnya.

8. Justeru, Malaysia telah pun mencadangkan agar isu penindasan etnik Rohingya ini dikemukakan kepada mana-mana mahkamah antarabangsa. Pada masa ini, satu proses penyiasatan telah pun bermula di Mahkamah Jenayah Antarabangsa (*International Criminal Court - ICC*).

9. Dalam hal ini, Malaysia berpandangan bahawa Majlis Keselamatan PBB (*United Nations Security Council - UNSC*) juga berperanan untuk merujuk isu Rohingya ini kepada proses kehakiman antarabangsa, termasuk dalam menubuhkan tribunal antarabangsa dengan mandat khas. Namun, kuasa-kuasa P5 Majlis Keselamatan PBB masih tidak boleh bersepakat berhubung perkara ini. Walaupun begitu, Malaysia akan terus menggembeleng tenaga dengan negara-negara yang sependirian (*like-minded countries*) untuk memastikan agar keadilan dapat dilunaskan kepada etnik Rohingya.

Sekian, terima kasih.

PEMBERITAHUAN PERTANYAAN BAGI JAWAPAN LISAN

MESYUARAT KEDUA, DEWAN RAKYAT

PENGGAL PERTAMA, PARLIMEN KEEMPAT BELAS

MAJLIS MESYUARAT DEWAN RAKYAT

PERTANYAAN : JAWAB LISAN

DARIPADA : DATO' SRI AZALINA OTHMAN SAID

[Pengerang]

TARIKH : 29 OKTOBER 2018 (ISNIN)

SOALAN :

Dato' Sri Azalina Othman Said [Pengerang] minta **MENTERI PEMBANGUNAN WANITA, KELUARGA DAN MASYARAKAT** menyatakan adakah Kerajaan akan memberi keutamaan kepada Rang Undang-Undang Gangguan Seksual dalam sesi Parlimen kali ini memandangkan kes-kes yang melibatkan gangguan seksual di pelbagai peringkat semakin meningkat.

JAWAPAN: YAB DATO' SERI DR. WAN AZIZAH DR. WAN ISMAIL,
TIMBALAN PERDANA MENTERI MERANGKAP
MENTERI PEMBANGUNAN WANITA, KELUARGA DAN
MASYARAKAT

Tuan Yang di-Pertua,

Kementerian Pembangunan Wanita, Keluarga dan Masyarakat memandang serius mengenai isu gangguan seksual yang berlaku di negara ini. Pada masa ini, Malaysia tidak mempunyai undang-undang khusus bagi menangani isu gangguan seksual. Walau bagaimanapun, terdapat beberapa peruntukan undang-undang / Kod Amalan dan Garis Panduan yang telah diperkenalkan oleh Kerajaan dalam membendung gangguan seksual iaitu:

1. Kanun Keseksaan (Akta 574);
2. Pindaan Akta Kerja 1955 (Akta 265);
3. Kod Amalan Untuk Mencegah dan Membasmi Gangguan Seksual di Tempat Kerja (1999); dan
4. Garis Panduan Mengendalikan Gangguan Seksual di Tempat Kerja Dalam Perkhidmatan Awam (2005).

Berdasarkan statistik Jabatan Perkhidmatan Awam, terdapat 47 kes gangguan seksual dalam sektor awam bagi tempoh 2015 sehingga 2017

dan bagi kesemua kes tersebut, tindakan tatatertib telah dikenakan. Manakala bagi sektor swasta pula, sebanyak 64 kes telah dilaporkan kepada Kementerian Sumber Manusia bagi tempoh yang sama.

Kerajaan melalui Kementerian ini akan meneruskan usaha penggubalan Rang Undang-Undang Gangguan Seksual di mana Kementerian akan mengadakan perbincangan bersama Jabatan Perkhidmatan Awam dan Kementerian Sumber Manusia bagi mendapatkan maklumat mengenai kes-kes gangguan seksual di tempat kerja di dalam sektor awam serta swasta. Manakala, perbincangan bersama Polis Diraja Malaysia akan meliputi maklumat lain di tempat awam, institusi pendidikan atau daripada aduan awam. Di samping itu, satu kajian menyeluruh akan dijalankan selama tiga bulan untuk mengkaji kelompangan di dalam perundangan / peraturan sedia ada yang merangkumi sektor awam dan swasta di Semenanjung Malaysia, Sabah dan Sarawak dalam menangani isu ini.

Hasil kajian gangguan seksual tersebut akan disusuli dengan sesi libat urus bersama pelbagai kementerian, agensi, badan bukan kerajaan dan kerajaan negeri bagi mendapatkan pandangan untuk mewujudkan satu

akta baharu khusus yang merangkumi segala bentuk gangguan seksual serta meliputi isu gangguan seksual di tempat awam di Malaysia.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL PERTAMA
PARLIMEN KEEMPAT BELAS**

PERTANYAAN : LISAN

DARIPADA : TUAN SABRI BIN AZIT [JERAI]

TARIKH : 29 OKTOBER 2018

SOALAN NO.47

Minta **MENTERI PENDIDIKAN** menyatakan adakah pihak Kementerian bercadang mengekalkan mata pelajaran tulisan jawi dalam buku teks sekolah di seluruh negara setelah tulisan jawi diabaikan akibat Akta Bahasa Kebangsaan 1963/67 yang dikuatkuasakan pada tahun 1971.

JAWAPAN

Tuan Yang di-Pertua,

Untuk makluman Ahli Yang Berhormat, Kementerian Pendidikan Malaysia (KPM) tidak pernah mengabaikan tulisan jawi malahan sentiasa menjalankan usaha memperkasakan penggunaan tulisan jawi di sekolah. Berdasarkan kurikulum sedia ada, tulisan jawi tidak diajar secara khusus sebagai satu mata pelajaran. Tulisan jawi adalah salah satu komponen yang diajar di dalam mata pelajaran pendidikan Islam yang melibatkan kemahiran membaca dan menulis tulisan jawi. Kemahiran-kemahiran tersebut telah didedahkan pada peringkat sekolah rendah di dalam mata pelajaran Pendidikan Islam serta diperkukuhkan lagi di dalam mata pelajaran yang sama di peringkat sekolah menengah.

Pelaksanaan Kurikulum Standard Sekolah Rendah (KSSR) (Semakan 2017) dan Kurikulum Standard Sekolah Menengah (KSSM) yang mula dilaksanakan pada tahun 2017 turut memperlihatkan kesungguhan KPM untuk mengekalkan tulisan jawi di dalam mata pelajaran Pendidikan Islam. Dokumen Standard Kurikulum dan Pentaksiran (DSKP) serta bahan sokongan seperti modul pengajaran dan pembelajaran termasuk buku teks telah dihasilkan menggunakan tulisan jawi. Melalui Program jQAF di peringkat sekolah rendah, telah ditetapkan agihan satu (1) waktu daripada enam (6) waktu seminggu dalam mata pelajaran Pendidikan Islam dikhaskan pengajaran dan pembelajaran jawi. Komponen jawi juga diajar dan ditaksir secara berterusan di dalam proses pengajaran dan pembelajaran murid melalui Pentaksiran Bilik Darjah (PBD). Malah, ianya juga turut di uji di dalam Pentaksiran Tingkatan 3 (PT3) dan Sijil Pelajaran Malaysia (SPM).

Kesinambungan usaha memperkasa tulisan jawi melalui mata Pelajaran Pendidikan Islam juga berlaku melalui penerbitan buku teks mata pelajaran tersebut. KPM masih mengekalkan penggunaan tulisan jawi dalam semua buku teks Pendidikan Islam sekolah rendah dan sekolah menengah. Langkah pengukuhan kemahiran jawi juga dilakukan melalui Kem Kecemerlangan Jawi (KCJ) bagi murid-murid yang lemah dalam membaca dan menulis jawi. Murid-murid ini akan dibimbing melalui modul Kem Cemerlang Jawi. Modul Kem Cemerlang Jawi disediakan berdasarkan aras kemahiran murid yang berkenaan dan dilaksanakan secara berpusat di peringkat Pejabat Pendidikan Daerah (PPD) dan Jabatan Pendidikan Negeri (JPN).

RJM54

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL PERTAMA
PARLIMEN KEEMPAT BELAS**

PERTANYAAN : LISAN

**DARIPADA : DATO' SRI BUNG MOKTAR BIN RADIN
[KINABATANGAN]**

TARIKH : 29 OKTOBER 2018 (ISNIN)

SOALAN NO. 48

Minta **MENTERI PENDIDIKAN** menyatakan apakah pendirian Kementerian dalam melaksanakan janji pilihan raya Pakatan Harapan berhubung penangguhan pembayaran balik pinjaman PTPTN bagi peminjam berpendapatan RM4,000 sebulan dan ke bawah.

JAWAPAN

Tuan Yang di-Pertua,

Untuk makluman Ahli Yang Berhormat, kajian holistik mengenai dasar baharu bayaran balik pinjaman Perbadanan Tabung Pendidikan Tinggi Nasional (PTPTN) telah selesai dilaksanakan dan akan dibentangkan ke Mesyuarat Jemaah Menteri untuk dimuktamadkan.

Antara inti pati cadangan pelaksanaan dasar baharu tersebut ialah kaedah bayaran balik bulanan secara potongan pinjaman berjadual dan kadar potongan atau bayaran balik pinjaman PTPTN akan ditentukan berdasarkan peratusan tertentu daripada pendapatan bulanan peminjam. Sekiranya cadangan dasar baharu bayaran balik pinjaman PTPTN dilaksanakan, pelarasan semula amaun potongan pendapatan peminjam perlu dilaksanakan selaras dengan cadangan peratusan potongan yang telah ditetapkan

Cadangan pelaksanaan dasar baharu tersebut telah mengambil kira kesan kewangan yang minimum kepada PTPTN bagi memastikan kelestarian dapat dikekalkan, di samping merealisasikan manifesto Kerajaan Pakatan Harapan melalui pengurangan bebanan bayaran balik kepada peminjam.